


MÂYÌ ÀDÌ ÀNUKÙ DÎBÀ DYÔNSÒ

ÀPÀTUKA MU LUBWEBWE

 Tudi ne kusàkidila mu dindà emu bwà Bwikadi bwà Mukalenge Nzambi, bùdì bufwànyine kubanga ntwàdijilu wa masangisha ne kutùpèèshà kwà mukenjì, wà ne—wà ne bìdì bitùkengela “kutèèleja, kwikala ne kaneemu” kumpàlà Kwèndè, bwà ne Yèyè ùdì ne cintu kampàndà cyà kutwàmbila. Ndi mutwìshìibwe ne Yèyè neènzè cìdìYe mulayè. Yèyè ùtu misangu yònsò ànu mushààle mukwàte ku Dìyì Dyèndè. Ne pa nàнку tudi ne kusàkidila bwà kwikala badìsangishe, ne mwoyi, elu luseke lwà Cyèndèlèlè mu dindà emu, ne bakùmbàne mwà kukuukwila cyàkàbìdì Mukalenge, ne kudìsangishakù twètù biine ne kutèèleja maalu à kùdìYe. Ki kabingilà kàtùdì tùdìsangishila, mbwà kòkò kiipàcilà mene aka.

² Mpindyewu, ndi mwenze anu bu mupàtukileku Mwanèètù Neville, múmvwà nciyi mutèkèmene to, leelu ewu, bwà cilootà kampànda ncímvwà muloota. Aci... Ntu ngiitabuuja mu... Ntu... mu bilòòtà. Ntu ngiitabuuja ne Nzambi ùtu ùkwàta mudimu ne bantu ku bilòòtà. Kàdi mvwa mulòòte cilòòtà cyà pabwàcì menemene, bufùkù bwà dyàbwàbwà abu. Ne, mvwà ngenda ndònda luseke lwà kakùnà, luseke kampànda lwà kakùnà, ngenda nya ku mwaba wa didiila kùmvwà ne cyà kupeta cyàkudyà cyànyì—cyànyì cyà mundaamuunyà. Ki mèmè kumòna ne, pàmvwà ngenda nsemena ku mwaba awu, bàvwa bìmba mìjiki, cisùmbù kampànda cyà bimbi cìvwa munkacì mwà kwimba mìjiki, ne bìndaalà, ne ciikàle munkacì mwà kucyònkomoja bantu pàvwàbo bàdya apu. Kàdi kùvwa cintu kampànda mu cyòcì amu cìmvwà nciyi munangèku to, pa nàнку mèmè kulekela ànu cintu aci ku luseke. Ki mèmè kutwilangana ne muntu kampànda wènda ùbànda kakùnà. Ki mèmè kutàngila, nènku bantu bààbùngì bàvwa bènda bàbànda kakùnà aku batàngile ku mwaba wà didiila awu. Kàdi mèmè kwenza bu mubeepuke, kukùdimuka kwalukila ku dyàbalùme, anyì, ku dyàbakàjì.

³ Kàdi mu mùshindù kampànda, mwinshì mu cibandabanda amu, mvwa mwà kumònamù tabernacle. Mèmè kuumvwa dìyì dyà muntu kampànda, dyàmba ne: “Ndà ùkatuutàkèènè ne Mwanèètù Branham mu disangu kampànda. Ùdì wenda utuuluka ku lusongo lwà kakùnà kwàka. Nènku ùmwambile bwalu kampànda.” Ki mèmè kulwijakaja bwà kufika mu dyòdì disangu adi.

⁴ Kàdi pààkalwà mwinè muntu awu, ùvwa mmwanèètù Neville muvwàle nkooci wèndè wa mufikùlùke awu, ùvwa ne

mmwènekelu ànu udiyè musòmbe nendè mu dindà emu ewu. Ki kwambayè ne: “Mwanèètù Branham, byôbì ne newikalè mu cimenga,” yêyè ne, “mbifwànyimne kwikala ci—cintu cîmpè bwà wêwè kupwekamù, bwalu Mwanèètù Hank...” Mpindyewu, umwèpelè ûndiku mumanyè dyèndè, Mwanèètù Hank, m’Mwanèètù Heny Carlson, tutu tumubiikila ne Hank. Yêyè ne: “Mmufwànyine kwela meeji ne cìvwa cintu cyà pabwàci bwà ne kwèna mutàmbe kulwa kukùmbula tabernacle bu wêwè mwà kwikala mu cimenga emu, anyì mu nyungulukilu wa cimenga ndambù wa matùkù.” Mémè kutàbuluka.

⁵ Nènkù, pa cyôci aci, mémè kwenza ànu bu wadyũmvù mu mùshindù wà pabwàwù. Ncìvwa muswè kudibweja mu ndongamu mu cikondo aci cyà lumingu to, too ne pàngàalu kukonka Mwanèètù Neville ní ùvwakù ne cintu cyà pabwàci mu dindà emu, bwà èkèleeziyà. Pa nànkù kwikalayè ne musàngèelu wàbùngì, mwèndè amu’s, kwambayè ne: “Lwàku.” Pa nànkù, ki patwàfikì apa. Mvwà mumubiikilè ku telephone makèèlèlè awu ku shòò mu mapingaja amu, ne kulwa mu dindà emu’s, kabiyikù byà ní nganyì wa kutùdi mutèkèmenè to.

⁶ Mpindyewu ndi ngeela meeji ne ncifwànyine kwikala cintu cîmpè, dyàmbedi, bwà ngǎnjiku ànu ku—kunùumvwija bintu kampànda. Mémè, mbyenzè bu ne, ntu muntu wa pabwèndè bwà bantu bààbùngì. Ne mu mùshindù kampànda, ntu kàbidì muntu wa pabwèndè bwànyì mémè mwinè. Bwalu, ndi nteeta kulonda bulombodi bwà Nyumà Mwímpè, ànu pabwípì ne mwànyì mwònsò. Nènkù aci ncìdì cyèza ne twikalè bàà pabwètù, nwamònu’s. Tudi twenza bintu mu mùshindù wà—wà tushààla cyà bushùwà basòmbe ne tudikonka mîngà misangu ne: “Ndi mwenzè cintu bu nùnkù bwà cinyì? Mmunyì mùndiku mwenzè cintu bu nùnkù’s?” Ne díbà adi mene udi mwà kudyàmbidila ne udi mwenzè menemene cìvwa kaciyi cìkengèlè bwà wêwè kwenza to. Kàdi bu wêwè ànu mwà kwikala ne lutùlùlù, ne kwikala ne diitabuuja, ne mwikalè mutwishìibwe ne Nzambì mmukulombòle bwà kucyèza, neucisangànè ne cìdì cìkùmbanangana mu cyôci menemene. Nwamònu anyì? Ne misangu yàbùngì tudi tusangana nànkù awu. Ne ndi mumanyè ne Mwanèètù Neville mmusangànè cyôci aci, misangu yàbùngì. Ne balombodi ne bantu bàà nyumà bàdì bàfika ku dyumvwa aci.

⁷ Kùkaadi cikondo kampànda mu nsòmbelu wanyi cyà... Bwà kwamba menemene, kacya ànu pàncìvwà mwànà mutekète, kacya ncituku mwanjì kuumvwa bulombodi bwinè bwà ne bìvwa bìnkèngela bwà mémè kwikala musòmbèle mu—mu Jeffersonville emu to. Citu misangu yònsò ànu ne katanyi, bwànyì mémè bwa kuteeta kwikala musòmbèle mùneemu. Cyà kumpàla, kuulu kùdi kùpanganangana naanyì byenzè ne bibì be. Cìkwàbò cintu, kùdi kùmwèka bu kùdi dibungama dyà nyumà.

8 Pàùdì walukila bwà kutàngila mwab'ewu, pìikalàwù kawùyi mubùtùdìbwe mu cikondo cyà dipaasalala dyà màyi to, kùdi mukàndà mumfùndila bwà bwalu abu, wùngàakapetà, pàncìvwà mfuminaku ku dibìikidìibwa mu mudimu wà bwambi, mèmè kubanga kuumuka. Ki mèmè ne Mwanèètù George DeArk . . .

9 Ne mamwëndè wa Mwanèètù Graham Snelling, Mwanèètù Hawkins udi ulombola cyujidi cyà kàsòloonyi mu New Albany awu, ne bààbùngì bàà ku bantu abu, kutwilanganabò naanyi pambèlù pàà kaaba kakesè kàà disangisha dyà milòmbò mwaba ewu. Kwambabò mene ne, bu mèmè mwà kushààla, bàvwà bafwànyine kukèèpesha didyà dyà bânà bààbò balela ku mèèsà, bwà—bwà kwibakabò tabernacle kampànda, bwà kabikèngedikù bwà kwikalabò bàtànkekajiibwa bàya eku ne eku to.

10 Pàngààkuumvwà maamù mukesè awu, ne mwànà umwèpelè mukwàta ku cyanza ne mukwàbò mwambula mu dibòko, wàmba ne yèyè ùvwa muswè kukèèpesha didyà dyà bânà bèndè ku mèèsà, bwa kwibaka kaaba kàvwàbò bafwànyinekù kushààla bwà kwikala kukuukwila, cyàkampicila mèmè bwà kucitwàla. Pa nàнку mèmè ne Mwanèètù George twètù kudisangisha ne kwangata dipàngadika dyà ne tuvwa mwà kushààla ne kwasa tabernacle.

11 Nènku pààkiibakiibwà tabernacle, bìdi misangu yònsò ànu bimwèka bu. . . Dìndà dìngààkalàmbulà tabernacle ewu, cikèènà-kumòna kulwaci, cidì cifùnda ne citèeka mu dibwe dyà mu ditumba mwàmwa, pààkangambilà Nyumà Mwimpè ne: “Ewu kì ngwebè tabernacle to.” Nwamònu anyi? Ki mèmè kukonka mwaba wùvwà wanyi tabernacle usanganyiibwa, ki Yèyè kunsòmbesha mwìnshì mwà maulu à bleu. Ki pashìishe Yèyè kwamba ne: “Enzà mudimu wà mutangadiki,” ne bikwàbò, munùdi bamanyè amu. Mbifùnda mene ne mu mikàndà.

12 Bintu byònsò abi bisanga pàmwè. Ne dìngà ditùkù pàmvwà munkaci mwà kukosa mashinda mu bulà bwà mwaba udi Mwanèètù Wood musòmbèlè mpindyewu ebu, ne màmwenu ùvwa musòmbèlemù mwine musangu awu; mèmè kusòmba pa cibàndilu cyà paanyimà, cibàndilu cikesè cyà kale cyà nshààmendà, cìmvwà mwibàkile kaaba kakesè aku bwà màmwènànyi. Ne yèyè ùvwa bu mulami wa ku èkèleeziyà aku mwine musangu awu, ùmukùba. Kàdi ànu bitòòke tòò mùdi muntu kanà yònsò ewu mufwànyine kwakula, Diyì kwakula naanyi, dyàmba ne: “Neyèna mwà kukubèneshakù to paùcidì ànu mushààle mwaba ewu. Bikèngela ùtapulukè ne bàà kwènù ne mwaba ewu.” Èè, mèmè, aci kàdi kunshiyaci ànu tusùnsukilà, bu lumingu lujimà nàнку anyi bipite apu.

13 Ku musangu ne ku musangu, dìbà dyònsò, Cintu kampànda citu ànu cindìmwija ne: “Umùkà ndà, umùkà ndà. Ndà mutàngile ku wesètè. Tùngunukà ne kuya ku wesètè.” Èè, ndi . . .

Citu misangu yònsò ànu cìntàcisha. Kàdi mbyenzè ànu bu ne musangu wònsò. . .

¹⁴ Mpindyewu, mwva mu meeji àànyì mulongòlòle ànu bitòòke tòò bwà ne mu lumingu elu mwva ngangata ndèkè mutangile ku Tucson, kúmvwà ne cyà kafucila mwaba kampànda, bwà kwikalakù movù wà mashìka ewu; bwà kubweja bânà mu kàlaasà, kubangila mu ngondo wa citèemà. Mwva ne mwaba awu. Kùvwa mene mwaba mumpèèsha kuntwaku. Kàdi kùdi cintu kampànda cìdì. . . Nènku—nènku mèmè muyè. . .

¹⁵ Cìkwàbò cintu cìndi njinga kwamba. Ànu kumpàlà kwà twètù kwibaka nzùbu ewu kaaba aka, nzùbu wa mpaasàtà, mwaba wùdiye mpindyewu ewu, ncìvwa muswè kwibakapù to. Mamwèndè wa mukàjàànyì ùkaavwa mukùlàkàjì. Ki yèyè kudila ne mwadi bwà bwalu abu, kwambayè ne: “Mèmè ncyèna ànu mwà kushiya mààmù mwab’ewu to, mumanyè ne yèyè ùkaadi mukùlàkàjì, ne mufwànyine kupanga wa kumubèèja.” Èè, mèmè kuumvwa aci. Mèmè ntu ngumvwa aci. S’ùvwa mmamwèndè’s, wa bwalu maamù umwèpelè uvwayèku pèndè nendè, anyi wìkalayèku nendè. Pa nànkù, mèmè kuumvwa aci. Ki mèmè—mèmè kusambila Mukalenge, mèmè kwamba ne: “Mukalenge, bu mùdìbi ne ncyèna munangè mwinè mwaba awu,” mèmè ne: “nsànkishèku. Nènye kwònsò Kùdi muswe bwà mèmè kuya aku, nguumukila nì mpenyì pònsò. Kàdi ncyèna muswè kubungamija mukàjàànyì to, bwà kuumumusha mwaba ewu, kuya nendè mu ditungà dycenyi mùdiye kàyi mumanyàngàne ne muntu nànsha umwe to. Ne pashìishe mèmè ntu dìbà dyònsò ànu muyè, nànsha mene. Nsànkishèku ànu bwà ngìikalè nendè mwab’ewu.”

¹⁶ Nènku mpindyewu, pàkaadi mamwèndè mwangàcìibwe apa, ne muyè mu Butùmbi, pashìishe ki dijinga dinènè dilwalwà cyàkàbìdì edi, nwamònu’s, mpindyewu bwà kutungunuka. Ncyèna mumanyè cyà dyenza to.

¹⁷ Ki pashìishe ditùkù adi pàvwà dilongesha edi divwà bânà bèètù bakùtùle myaba yònsò edi, Mèmè kwimana mu cyambilu musangu wa ndekeelu wùmvwà mwaba ewu mèmè kunwàmbila ne ncìvwa mwà kuyakù mu budimi bwà bwambi to pàvwàci ànu citungunuka. Pa nànkù, bânà bèètù ne ngàsà yònsò kulongololabò byònsò abi. Byònsò mbitòòkesha. Munda mwà mèbà makùmi àbìdì ne ànaayi, byònsò bijikè nkong.

¹⁸ Mpindyewu aci cidi cinkàngwila cyàkàbìdì budimi bwà bwambi. Ncyèna mumanyè cyà dyenza to. Ncyèna mumanyè njila wa kubwelela to. Ndi mulòmbè Mukalenge cikèèna-kumòna. Ndi muMulòmbè bwà àngambilè cyà dyenza. Kàdi mMundekèle ànu musòmbè.

¹⁹ Mpindyewu, makèèlèlè dilòòlò awu pàngùmùshì bânà bònsò, mukàjàànyì ne bònsò, kubùumusha mu nzùbu, mèmè kudilambula kùdi Mukalenge Nzambì. Ki mèmè kwambila Mukalenge Nzambì ne: “Bu Wèwè mwà kumbèneshakù mu njila

wûnyaaya awu, nênkukwàcìlè mudimu. Kàdi nebikengelè bwà Wèwè kundeeja kwà kuya, ne mùshindù wà kuya, ne cyà dyenza.” Pa nànkù, mêmè kudilàmbula kùdì Mukalenge. Ne—ne mudimu wà bwambi ne byònsò, mêmè kuwùlàmbula kùdì Mukalenge. Ki mêmè kwamba ne: “Kwònsò kÚdì ùkàngula aku, cyònsò cyÚdì wenza aci, nênnngendelè mu yèyè njila awu. Too ne pa Wàpèngà njila apu, mêmè nêntungunukè ànu mûndì nya emu too ne pa Wàpèngà njila awu.” Ki mêmè kuMulòmba bwà kucitòòkesha bwà ncìlu kuseeswishiiibwa pashiishe to, bwalu ndi cyà bushùwà ngiitabuuja ne tudì menemene ànu pa masangu a njila a cintu kampàndà bwà kwenzekaci.

²⁰ Ngácyũmvù bàcyàmba mu cipròfetà mu dindà emu kaaba aka kùdì Mwanèètù Neville, anyì mucifile pâmvwà mumanyè ne kùvwà—kùvwà nku cipròfetà aci kùvwàye ùleedila. Mpindyewu, ki bwà cinyì, nngánùsambìdìdì nwènu bònsò, ne ndi ne dìjinga dyà nwènu bònsò nùnsambìdìlèku, bwà Nyumà Mwimpè wàmónakù bwà kundombola ànu menemene kùdì kùkèngelà bwà mêmè kuya, cìdì cikèngelà bwà mêmè kwenza, bwà ncyènjikù cìlèma nànsha cimwè to.

²¹ Nudi numòna’s, misangu yàbùngì, bantu bàtu bèèla meeji ne dipà dyà cipròfetà, Nzambì ùdì wamba ànu ne: “Nênkwangàtè ànu wèwè *ewu*, ne nkusòmbèshè *apa*. Mpindyewu ndàaku ànu *apa* nùnkù.” Kàdi Yèyè kèna ùkwambila bintu byònsò abi to. Bu ne Úvwà mwà kukwambila, ndiitabuuja dyà bucìmunyi kaayi dyúvwà naadi? Nwamònu anyi? Wamònu’s, wèwè, Yèyè ùdì ùkulekela wimana wèwè nkààyeebè kutàmba muntu mukwàbò yònsò ewu. Nwamònu anyi? Nwènu nudi mwà kulwa kùndì bwà kunkonka maalu kampànda, ne Yèyè kacya kàtukù mwanjì kupangila to Útu munùpèeshe dyandamuna. Ncyà bushùwà. Èyowà. Kàdi ndi mwà kuMulòmba bintu bwànyì mêmè mwinè, ne misangu yàbùngì Yèyè ùtu ànu ùnshìya nkààyaanyì, nwamònu’s, ùnshìya ànu ntungunuka ne nkabwelamù.

²² Ndi ne maalu mpindyewu àdì àkèngelà bwà ngàdamunè mêmè mwinè, ne mapàngadika àdì àkèngelà ngàngatè. Ne edi ndyà mushinga mutàmbe bunène, mu mùshindù wà nciyi menemene mwà kudyàngata nciyi mutwishiiibwe ne n’Yèyè udi wakula naanyì to. Nènkù ndi—ndi. . . Nyewù kayi umpèeshakù cìkèèna—kumòna. Mmùndekela ànu nkàyaanyì nànkù. Pa nànkù ndi musòmbè ànu bu mwànà wa nshìyà, nànkù awu, mu dindà emu, nciyi—nciyi mumanyè ne kwà kuya nkwepi to. Pa nànkù, mêmè ndi mucilàmbùlè kùdì Mukalenge.

²³ Mêmè—mêmè kudyùmvwà dîbà adi ànu bu ne, mu kulòotà kwà cyòci aci, bivwa bikèngela ngàalukilè ku tabernacle eku nkwaçishèku Mwanèètù Neville too ne pàdì ànu cintu kampàndà cyènzeka mu lwendu amu. Pa nànkù, nêmmatè mu njila amu.

²⁴ Ndi mukonke Mwanèètù Neville katanci aka ne: “Èkèleeziyà ùvwà útanta bishi?”

Ki yêyè ne: “Bîmpè.”

²⁵ Ne pa nàнку ndi ngumvwa ne nucidi ànu ne mapà à Nyumà ne bikwàbò munkaci mwènù, biikàle bikwàta mudimu, mapà à cipròfeta, ne—ne dyakula dyà mu myakulu, ne dyandamuna dyà myakulu, diinè ditũmvù kwènji katanci aka adi. Ne bintu abi bidi bikolesha èkèleeziyà, bikolè menemene.

²⁶ Kàdi mvwa ndyàmbedila, pàmwàpa dilòòlò edi ne ndi mufwànyine, bu Mwanèètù Neville. . . Byòbì ne Nyumà Mwîmpè kí mmutùlombole ku cintu kampànda cishiilàngàne to, dilòòlò edi ndi muswè kwikala ne. . . Nwènù bònsò, kumpàlà kwà nwènù kuumuka mu dindà emu, bwà kufùnda lukonko ne kulùtèeka mwaba ewu, lukonko kampànda mu meeji èbè, bwà twamònaku mwà kujandula cidi èkèleeziyà wèla meeji. Ki mùshindù wùdi naawù bampaasàtà wà kujandula ànu cidi mu myoyi yà bantu. Nènku muntu ne muntu wa kunùdi udi ne lukonko, ùlùfùndè ulùtèkè apa nùнку. Wèwè kùyi ne kabèji bwà—bwà kulùfùndapù mu dindà emu to, dîbà adi ùlùfùndè dilòòlò edi, kumpàlà kwà dîbà. Pa nàнку, ndi muswè kwikala ànu ne dîbà dyàbùngi ne mwànyi mwònsò, pa yòyi ayi, bwà kuyikenketa ne kunwàdamuna bilondèshile Mifùndu.

²⁷ Nènku bu Mukalenge mwà kwanyisha, cyòci diswà dyà Nzambi; ndi mwabè dîyi mwab'ewu ànu àbidi àdi panshi aa ne, ndi muswè kwakula neenù pa Bitampì mwandamutekètè byà ndekeelu byà. . . byà Bwàkabuulwibwà. Mpindyewu bu twètù. . . Ncyèna mufwànyine kwangata Bitampì abi too ne ku ndekeelu cidimu eci to, bwalu bidi byàngacila kuumukila ku nshapità mwi6 wà Bwàkabuulwibwà, too ne—too ne ku nshapità wa 19, bwà kujikija Bitampì abi. Kàdi bisàtù anyi binaayi byà kumpàlà byà ku byòbì bivwa mwà kwandamunyiibwa mu dilòòlò kampànda, ngeela meeji, Citampì cyònsò cyàngata dilòòlò dimwè.

²⁸ Mpindyewu, bu twètù mwà kuumvwa, kumòna patùdi twimanyina pa Mukànda wà Bwàkabuulwibwà awu, mwaba wùvwà Èkèleeziyà mwàngaciibwe mu Butùmbi, pashiishe bikwàbò byàci bidi bitàngila beena Yudà, kí ng'Èkèleeziyà to nànsha kakesè. Bìdi bitàngila ditùngà dyà beena Yudà. Ki bwà cinyi bidi bikèngela twàlukilè cyànyimà, kuumukila ku Dyambwibwa dyà Èkèleeziyà, bwà kwangata. . . Tudi tumòna apa cidi cyènzekà mu cikondo cyà Bitampì abi aci, ne cikondo cyà Èkèleeziyà wa bàà Bisàmbà byà bendè. Èkèleeziyà mwikàle muyè; ne ne ditùngà dyà Izàlèlèlà, bìdi byàlukila ne byàngata Izàlèlèlà kubangila ku cikondo ciwàbi biimànyine, too ne ku cikondo cyà bwena leelù eci; too ne ku dilwa dyà Maasiyà, pààkidilàbo Maasiyà.

²⁹ Mpindyewu nwacyũmvù anyi? Èkèleeziyà mmwàngaciibwè muulu. Nzambi mmutàngile dyàmbedi bwalu bwà Èkèleeziyà, Bikondo byà Èkèleeziyà. Tuvwa bangàte aci. Dîbà adi Èkèleeziyà mmwàngaciibwe mu Butùmbi. Pashiishe Nyumà Mwîmpè ùdi

wàlukila ùkangata Izalèlèlè, bu ditùnga. Ne ùcítùùlula too ne apa, pàdì Didyà dyà Dibanjì munkaci mwà kwenzeka apu, ne pashìishe kuByàluja cyàkàbìdì ku ndekeelu kwà ciinè cikondo aci. Nèmbandishè mboodì wanyì wa kufùndila, nènku nènngìikalè mwà kuczòla ne kucìlongesha, pàalwà cikondo. Pashìishe Mukalenge ùdì wàlukila ne Mukàji-musèla, ne Izalèlèlè ùmumòna. Nènku, kaa, ncikondo kaa yi ciikalàci's wè!

³⁰ Mpindyewu, kumpalà kwà twètù kumòna mwà kutwangaja cyòci eci mu mùshindù mujaalàme, kùdì dileesòna dinène didì cilèndwishi kùdì beena tèlòlòjì ne bààbùngì, ne balongeshi munda mwà cikondo cijimà, ne beena Èglise de Christ ne aba bàdì bàlwa bwà kutèèleja cyòci eci, mbwena kwamba ne, Mbingu Makùmì Mwandamutekètè yà Danyèlè. Tudi ne... Katwèna mwà kuya kule menemene mu Bwàkabuulwibwà patùdì katùyì baswikàkàje Mukàji-musèla ne Izalèlèlè ne Mbingu Makùmì Mwandamutekètè yà Danyèlè to. Nènku pàmwàpa, bu Nzambì mwà kwanyisha, mu mùshindù wà ne bu Yèyè mwà kwakula naanyi mu matùkù àcilwalwà, bwà kwakula pa yimwè yà ku Mbingu Makùmì Mwandamutekètè eyi...anyi, kí m'Mbingu Makùmì Mwandamutekètè to, kàdì Bitampì mwandamutekètè byà ndekeelu. Pashìishe mu dyàlumingu dilwalwà, nènteetè bwà kwangata Mbingu Makùmì Mwandamutekètè yà Danyèlè, mu dyàlumingu dilwalwà edi, bu Mukalenge mwà kwanyisha. Nènku dìbà adi aci necikangulè cyalu pashìishe, bu Yèyè mutùlombòle, bwà kubanga bikwàbò abi. Èè, netùjandulè kubangila ànu apu.

³¹ Mèmè ne Mwanètù Neville netùkwatè mudimu pàmwè pa cyòci eci, ne kwenza cyònsò citùdiku mwà kwenza bwà dyàkalenga dyà bantu.

³² Mpindyewu, patùdì twalukila musangu wònsò, tudi tusambidila babèèdì, tutu misangu yònsò ànu ne disànkà dyà kwenza nànkù. Ne pàmwàpa nènngìikalè ncyènza mu disangisha dyònsò, bantu bòbò biikàle bàsaama, bwà kubàsambidila.

³³ Ncyèna njinga bwà kwenza kàbìdì dijingulula to. Nwamònu's, mpindyewu cìdì cyenzèke ncyòci eci. Nkàadi muteetè. Ne ndì mumanyè ne nkàadikù mwenzè bintu bìdì bibi; kàdì nkàadi muditàicìshe bwà kwikala ne nsòmbelu mutàmbe kwikala pabwìpì ne Nzambì, dìbà dyònsò, bwà Nzambì, mùshindù awu ngùvwà bìkèènà-kumòna ebi mwà kwenzeka, mùvwàbì mwà kwenzeka. Nànsha mene bantu bàvwa mwà kujìmija bintu, ne kumbiikila ku tèlèfonè, kundòmba bwà kuya kasambila Mukalenge, bwà kukonka ne bìvwa penyì. Mwàkajìmijà Ishàayi tumpundu, ne nsongàalùmè ayi kuyayi kapeta mupròfetà, ne yèyè kubàmbila mùkaavwà tumpundu atu tumanè kwalukila kumbèlu. Ne bikwàbò mùshindù awu, aci's cìdì ànu cìmpè menemene. Kàdì bìdì bìkafika ku divula bikolè, mu mùshindù wà ne bantu bààbùngì...Kaciyi ànu mu mwaba bu ewu nùnkù to; mpa buloba bujìmà, nwamònu's. Pa nànkù

cidi ànu cilwa, cinshiya mu mùshindù wà muumvwè maalu mantondè, ne cikulama mubindùlùke dībà dyònsò, bikafika too ne mu mùshindù wa . . .

³⁴ Nènkù ki cyàkafikishà bānà bèètù abu ku dibanga dilongesha adi, dyà ne mémè mvwa Mukalenge Yesù Kilistò mwandāmùke mubidi. Ne tudi bamanyè ne aci ncifwānyine ànu kunyangakaja Mudimu wa bwambi wònsò, ne kwela bundù pa Kilistò ne bikwàbò byònsò. Nwamònu anyi? Pa nānkù ki bwà cinyi byākakèngela bwà mémè kubānyūkusha bikolè, bwà kuciimanyika dyākāmwe, bwà kubāmanyisha ne aci kacivwa cyà kùdì Nzambi to, civwa cyà dyabulù. Nwamònu anyi? Kādi mbantu bimpè. Ne aci cyāleeji ne bantu abu mbalediiḃwe cyākàbìdì ku Nyumà wa Nzambi, bwalu, pāmònubò Bulelèlā ku Mifundu, bōbò kwalukila kùdì Nzambi, ànu menemene, nwamònu’s, dyākāmwe. Pa nānkù, aci cyāleeji ne ùvwa n’Sàtaanà ùteeta bwà kwenza cintu kampānda ne bantu; bàvwa bōnsò bantu bàà difwānà dyà Nzambi, beena Kilistò.

³⁵ Ne cyāfikishì bààbūngì bàà kùdìbo ku dingambila ne: “Mwanèètù Branham, twāpēcì mpindyewu dikweyemena dyàbūngì kutāmba mutùvwāku naadi kacya kwònsò eku.”

³⁶ Bwalu, mōnaayi ne, ne dipà didì Nzambi mumpèeshe edi, cīmvwà mufwānyine kwikala mwenzè ne cyōci aci ncinyi? Mwelè ditungà ku makāsà àānyì, anyì, bantu’s. Citùdì twètù tubiikila ne *nditunga* aci, kī “n’kosmos” ewu, tu—tuzòòlò twà kumana naatù mikiiyà ne bikwàbò atu to. Ndi njinga kwamba beena Kilistò, mwena kwitabuuja mulelèlā, udi busùkusuku bwà . . . Patùdì twakula bwà *ditunga*, tudi tuyiisha bwà “bantu bàdì balediiḃwe cyākàbìdì,” kī citùdì twamba, ditunga. Kī ng’ànù bantu bōnsò bàdì pambèlu apa aba, bàdì ne bukooyà ne bitoci mutùdì basombèle pa buloba apa aba to, aci cidi ànu—aci cidi ànu lupwishi lwà buloba lùdì lwàlukilā. Ndi ngamba beena Kilistò balediiḃwe cyākàbìdì, bantu bàdì beena Kilistò balelèlā.

³⁷ Ndi mwindile bwà muntu kumbùndulayè cyākàbìdì pa bidì bitàngilā cintu kampānda. Muntu kampānda mmulwè kùndì àbìdì àdì panshì aa, wamba ne: “Cingènyingenyi ciinè’s, cyà ne Kilistò wàkatwila mate panshì aci, ne mate Èndè awu, wenza citàpitàpì ne ùcimeteka pa mèsù à muntu apu.” Yèyè ne: “Mùshindù mwinè wùvwàci cyà bukooyà, cyà manyaanù’s, bwà Yèyè ùtwila mate, ne mate Èndè à mukana Mwèndè awu! Mùshindù mwinè wùvwàbi kabiiyi byà mankendà’s, bwà kutwila mate mu lupwishi, ne kwenza citàpitàpì cyà bitoci kadi kucilaaba pa mèsù à muntu.”

Mémè kwamba ne: “Kādi’s wàkaalukila mwikàle ùmòna.” Nwamònu’s, s’ncyōci aci.

³⁸ Ne muntu umwèumwè awu! Mbakàngùle citùùdilu cyà beena kaabutakà kuntu kwàka pabwipi ne kwānyì kumbèlu,

nudi bamanyè's, ciinà cyà máyì cyà dyowela. Nènku—nènku muntu awu ùdi ne tiké bwà yónsò wa ku bânà bèndè bwà kwikalabò bàkowela mu cyôci ciinà cyà máyì aci. Ne yêyè ne mukàjèndè, batu bàyakù pààbò, mu cyôci ciinà cyà máyì aci. Nwamfwilaayikù luse, nwènù bânà bèètù bàà bakàjì. Kàdi mwômò mùtù bakàjì abu bàya kowela amu, bakàjì lukàmà, anyì nkàmà yìbìdì, ditùkù dyónsò; bakàjì, bukooyà bwónsò abu ne bikwàbò, ne bakàjì abu leelù ewu, ne bàdisàmpulwila mu máyì amu, bukooyà ne manyaanù awu mukana mwàbò amu, bààmìna bààtwìla. Ndi muswè ànu àmbundè, nwamònu's.

³⁹ Bàvwa bàmba ne: “Bu—bu Kilistò mwikàle ne mwoyi leelù ewu, s'bàvwa mwà kwikala baMukwàcishe bwà cintu cyà bukooyà aci.”

⁴⁰ Kàdi bwà *aci* udi wamba bìshi? Ndi mutwìshìbwe ne nudi nuumvwa cìndì muswè kwamba aci. Bàdi bàya buludì mu ciinà cyà máyì aci, ne bààbùngì bàà kùdìbo ne màsaamà, à kàsèndà, masasà, ne bikwàbò byónsò, ànu mwômò amu mene. Nènku bìikàle ànu nuàtwìla mukana mwènù amu, ne bikwàbò byà mùshindù awu, ne bìikàle nudisàmpulwilamù mùshindù awu. Nènku aci kì mankendà's, mu bushùwà bwà bwalu?

⁴¹ Pa nàнку, kaa, ekèlekèle, edi ditùkù ditùdì ne mwoyi edi, mwanèètù wa balùme, mwanèètù wa bakàjì! Dìbà dyàkùmbanyi bwà Dilwa dyà Mukalenge! Nènku Èkèleeziyà ùdi ne ditèkemena òmwèpèlè, ne n'Dilwa dyà Mukalenge.

⁴² Èè, kì mmèmè ùdi mwà kwimanyika bintu abi to; kì ncìdì cikèngelà to. Bible ùkaadi mumanè kudyànjila kwamba ne bìvwa mwà kwikalakù. Mèmè ncyèna mwà kubiimanyika to. Kàdi ndi muswè bwà díyì dyànyì kwikaladì dikwàta pa mukàbà wà méyì mu Dyulu ne, mèmè mvwa mbèngangana naabì, pààlwà dìbà bwà Cilumbulwidi. Mvwa mbèngangana naabì.

⁴³ Mèmè ncìdì ànu ngiitabuuja ne Bible ewu's n'Diyì dyà Nzambì. Pashìishe kakwèna cikwàbò cintu nànsha cimwè pa buloba, cyà cibèngangana Nèndè, cìdiku mwà kuMwimanyika. Kàdi Bible ewu kaaba aka, eci kì Bulelèlà, eci kì Díyì dyà Nzambì. Pa nàнку mpindyewu, tükokàayi ànu bilàmbà byètù—byètù—byètù bìdì bikwàta lupeepèlè, ne twèlàayi lwongò ku mwelelu wà ditalala wà Mwaba wà Diikisha. Nènku—nènku netwìkalè mwà kwasa lwendu mu màzuwà mààlabà tuye ku mwaba kampànda, kàdi twànjàayi ànu kwela lwongò mpindyewu ne kutèelejakù Díyì dyà mukana mwà Taatù wetù wa mu Dyulu pàdiYe mufwànyine kwakwila neetù ku Díyì Dyèndè, mutùdì batwìshìbwe, leelù ewu.

⁴⁴ Nènku dilòlò edi, mpindyewu, ùlongololè kaalukonko kakesè kaùdì mwà kwikala naakù pa bwalu abu. Mpindyewu, kì ncintu cìikalà mwà kwenzela muntu bìbì to. Wèwè wenza nàнку, dìbà adi aci cidi. . .Ncyèna mufwànyine kwandamuna alu nàнку to, twamb'eku twamb'eku, nwamònu's. Kàdi wèwè,

cintu kampànda cikwàbò, wamba ne: “Èè, mpindyewu, mèmè mwenzè cintu *kampànda*, Nzambì ùdiku wamba ne bìvwa bikèngela bwà twètù kwenza cikampànda anyi?” Anyi, nudi bamanyè’s, tukonko tukesè pa mwoyi wèbè. Anyi ne: “Tudi ne mapà ènzeka munkaci mwètù, Mwanèètù Branham, nènku bivwa bikèngela bwà twètù kukwàta naawù mudimu mùshindù *kampànda* anyi mu mùshindù *kansanga* anyi? Anyi ne, cìvwa cikèngelà bwà twètù kwenza ncinyi?” Cintu kampànda cìndi mufwànyine kukwandamwina mu Mifùndu, nudi numòna’s. Ùfundè kaacintu kakesè. Ndi mufwànyine kwikala ne disànka. Nènku kwòkò kakùyì nànsha lùmwè to, dìbà adi nèngàngatè ànu cyena-bwalu cyà mùshindù kampànda, ne kunùyiisha dilòòlò edi, bu Mukalenge mwà kwanyisha. Eci’s ndyàlumingu, nènku ndi. . .

⁴⁵ Dyàlumingu dishàale, mvwa mwasè lwendu bwà kuya kwà Mwanèètù Cauble. Kàdi mèmè kuumvwa ngonga wa èkèleeziyà ewu ùdila, pàànyì mwikàle ànu mbànda mpweka mu lubànzà amu. Ncìvwakù mwà kucitwàla to. Ki cyònsò cìvwàku’s. Mèmè kunùmvwa, pa nànku kukèngelabi ànu bwà mèmè—mèmè—mèmè kulwà apa.

⁴⁶ Pa nànku mpindyewu twànjàayaaku ànu kwinyika mitù yètù mpindyewu bwà twàkulèku ne Mutùfùki, ne pashiishe mu mwakù wà disambila. Kùdikù muntu ne dilòmbà dyà pabwàdi anyi? Elàayi ànu byanza byènù muulu, ambàayi ànu ne: “Ndi. . .” Dìmanyishè ànu cyanààna. Nzambì ngudi mumanyè cìdì pa mwoyi wèbè apu. Mpindyewu shàala ànu mulamè dilòmbà dyèbè mu meeji èbè amu.

⁴⁷ Nzambì mutàmbe Cijila, Wèwè utu mufùke Maulu ne buloba ku Dìyì dyà mukana Mwèbè, ku meeji à mu mutù Wèbè. Nyewù tubwela mu Bwikadi Bwèbè, tubwelela ku Yesù Kìlistò, Mukalenge wetù, bwà kuKwela twasàkidila bwà byònsò byÙdi mutwènzèle. Ne tudi ne kusàkidila kwàbùngì Kùdì, Mukalenge, mu dindà emu, bwà kumanya mwaba wutùdì biimànyine, kumanya kaaba katùdì mu dindà emu, ne bwalu-bulonda bwà cikondo, ne matùkù àcilwalwà. Bamanyè leelù ewu ne, ku ngàsà wa Nzambì, kutùdì basukula mu Mashi à ku Kàlvariyò, bwà ne tudi balongolola, ne diitabuuja mu myoyi yètù, bwà kutwilangana Nendè bu ne bìvwa bikèngela bwà kulwaYè leelù ewu. Bivwa bikèngela twètù kwamba ne: “Nànsha nànku, lwàku, Mukalenge Yesù.”

⁴⁸ Nènku nyewù tumòna mpèkaatù ùngwila mushikì, mu mùshindù wà bimwèka ànu bu ne buloba bùdi bütènkakana ku bwenzeji bwà mpèkaatù. Mùshindù mwinè wùdì dinwà dyà maalà, dinàyà dyà twartà twà mfrangà, dipicisha dyà dìbà mu maalà ne bisànkasanka, ne dyenda dyà butakà, ne, Èyì Nzambì, bukooya, ne manyaanù ne bintu bibì kumònà byà bantu. Ne mùshindù mwinè wùdìbo, bu ne bàvwakù mwà kumanya’s, Mukalenge! Bantu abu, bàdi bàvwàla mùshindù awu tulàmbà

twà kale twà katùyì tùneemeka Nzambì atu, ne bàpàtuka mu mùsèèsù mwàmwa, mbamanyèku ne kabèèna cingà cintu ànu bìshiishì ne lupwishi, ne pàmwápa mu lumingu lùmwè bìshiishì nebiikalè bidya mubidi wùdìbo munkaci mwà kutùmbisha awu anyi? Mbamanyèku ne mikùmbì yà yelèkè neyiwùdyè, ne musùkà wàbò newikalè mu Cyendèlèlè kampàndà mwàmwa kawùyì ne Nzambì, kawùyì ne Kilistò, kawùyì ne ditèkemena, wènda wùtùkina mu ndòndò wa wùdyùmvwa mujimine, bwà kwikala ànu mubùtùdìlwe ku Dilwa Dyèndè anyi? Èyì Nzambì wa yààya, tùpèèshèku mèyì à—à didimwija, bwà twamònakù mwà kudimwija musùkà wònsò ku njìwù yìdìbo bàseemena naayi pabwìpì eyi.

⁴⁹ Ikàlàku neetù leelù ewu. Tùpèèshèku “mèyì à lungènyì,” mwàkambà Solòmò musangu kampànda mu Mwambi ne, tuvwa mwà kwikala “biibaki bàà lungènyì,” ne tuvwa mwà kwikala “balami bàà mikòòkò bàà disangisha edi.” Nènku tudi tulòmba, Mukalenge, bwà patùdi tukèbulula mèyì à kwamba apa, bwà kwikalabò—kwikalabò midimu myowela byanza yàbàkulàku mwoyi wùdi mu lukèngelu kaaba aka mu dindà emu awu.

⁵⁰ Katwèna balwè kudisangisha mwinshì mwà musàkà wà luuyà lukolè ewu leelù ewu, ànu bwà kutùmònabò nànsha, kàdi tudi balwè mwaba ewu mbwalu tudi baKunangè, ne bwalu tudi ne dijinga dyà kuKutèèleja. Wèwè udi Mutùnangi wetù utùdi banangè, ne tudi tujinga kuumvwa Mèyì à kùdi Wèwè. Tudi ne kusàkidila bwà bitùkaadi bamanè kuumvwa. Nebishaalè neetù ntàntà mule. Mpindyewu tùpèèshèku citùpà cyÙdi naaci bwètù twètù leelù ewu, patùdi baKwindile kàbìdi apa. Tudi tulòmba nùnkù mu Dìna dyà Yesù, ne bwà bwalu Bwèndè. Amen.

⁵¹ Mpindyewu tukàadi. . . [Mwanèètù wa bakàjì kampàndà ùdi wàkula mu myakulu, mwanèètù wa balùme kampàndà ùdi wàndamuna—Muf.]

⁵² Tudi ne kusàkidila bwà mèyì à makùmbù à kùdi Nyumà aa, àdi àtwàmbila ne àtùdimwija bwà kutàbaleela Mèyì pàmwápa ikalà Nyumà Mwimpè mwà kutwàmbila leelù ewu. Kàdi katwèna ànu bamanyè cìdìYe naaci mu cibùcilu bwètù twètù to, kàdi tudi cyà bushùwà bamanyè ne kùdi ne cyà kwikala cintu kampàndà cìikalàYe mwà kupàtula. Pàmwápa ní lukonko kampàndà lùdi mu meeji èbè amu, lwikalàYe mwà kwakwilapù. Yèyè mmufwànyì kucyàmbidila mu Dìyiisha dyà mu dindà emu edi. Yèyè mmufwànyìne kucyàmba dilòlò edi mu disangisha. Yèyè, pa dìbà kampànda leelù ewu, Ùdi munkaci mwà kuteeta bwà kucyèenza, mùdìbi bìmwèka, ùdimwija muntu kampàndà bwà kubàkulayè Mèyì awu.

⁵³ Mpindyewu bwà kubuulula mu Dìyì difùnda, tuyaayi mu Mukàndà wà Ekèsòdè, bwà dileesònà dyà Kàlaasà kàa Dyàlumingu.

54 Nudi ne mudimu wà dibàtiiza anyi? [Mwanèètù Neville ùdi wàm̄ba ne: “To, kí ntoo ne pa díbà isambòmbò díldòlò edi to.”—Muf.] To. Mudimu wà dibàtiiza wùdi pa díbà isambòmbò mu mapingaja emu.

55 Tùyaayi ku nshapità wa 17 wa Ekèsòòdè, biikàle tubangila ku—ku mvensà mwi5, ngeela meeji, mvensà mwi5 ne mwi6 wa nshapità wa 17 wa Ekèsòòdè.

Nènku MUKALENGE wàkambila Mòsà ne: Ndà kumpàlà kwà cisàmbà, ne angàtā bām̄wè bàā ku bakùlù bàā Izàlèèlā pām̄wè neebè; ne dikombo dyèbè, dyúvwà mutuutè naadi musùlù adi, dyāngàtè mu cyanza cyèbè, kàdi ùye.

Mòna, mēmè nēngìmanè kumpàlà kwèbè...pa lubwebwe mu Holèbà; nènku...wèwè neùtuutè lubwebwe alu, ne nemùpatukè m̄ayi, bwà bantu bààmòna mwà kunwà. Ne Mòsà wàkenza nànkū ku mēsù kwà bakùlù bàā Izàlèèlā.

56 Mpindyewu byòbì bikèngela bwà mēmè kwinyika eci ne mmutù-wà-mwandà mukèsè wà Kàlaasà kàà Dyàlumingu, ndi muswè kwangata eci bu cyena-bwalu bwà dileesònà dyà mu dindà edi ne: *M̄ayi Àdì Anukù Àpàtuka Díbà Dyònsò Mu Lubwebwe.*

57 Tudi bamanyè ne Izàlèèlā ùtu misangu yònsò ànu cileejilu cyà mu maalu-malonda cyà èkèleeziyà. Bwalu, Izàlèèlā ùvwà cisàmbà cyà Nzambì too ne pàakapàtukàbo mu Èjjiipitù, ne pashìshe kwikalabò èkèleeziyà wa Nzambì bwalu bàvwa batàpùlùke ne bakwàbò bantu bàā pa buloba.

58 Nènku patùdi batàpùlùke ne bakwàbò bantu bàā pa buloba, díbà adi tudi tulwa èkèleeziyà. Kàdi patùcidì ànu babwelàkànàngàne ne bakwàbò bàā pa buloba, díbà adi katwèna mu èkèleeziyà nànsha. Mpindyewu ndi mutwishìbwe ne aci cidì ciya mu ndòndò menemene, cikakwàta mwaba wàci. Nwamònu’s, katwena èkèleeziyà to patùdi katùyì batàpùlùke ne bàā pa buloba. Tùtapulukàayi, pàtukàayi munkaci mwà bantu bàā nsòbelu wa bukooyà, kanubwelakanyi naabò, ne kanwikadi baabanyanganyi bàā mpèkaatù yàbò to. Kanwikadi mu cikòkedi cimwè ne beena bupidyà to, kàdi tàpulukàayi ne bintu byà pa buloba.

59 Nènku pàvwà Izàlèèlā mu Èjjiipitù, bàvwa cisàmbà cyà Nzambì. Pashìshe pàakabiikidiibwàbo bwà kupàtuka, anyi pàakenzàbò cimwangì, munkaci mwà kupàtuka, díbà adi bàakabiikidiibwa ne ng’èkèleeziyà, bwalu díbà adi mpàakatàpulukàbo ne bakwàbò bàā pa buloba.

60 Ne mwakù mwinè èkèleeziyà wùdi wùmvwija ne “babiikidiibwe bwà kupàtuka.” *Ekèsòòdè*, “pàtukàayi.” Yònsò wa kutùdi, twètù bu beena Kìlistò, tudi benzè cimwangì munda mwà mwoyi wetù. Tuvwa ne cikondo citwàkabiikidiibwà

bwà kupàtuka munkaci mwà beena dyètù, kubìikidiibwa bwà kupàtuka munkaci mwà bantu bàtùvwàku musangu kampànda naabò mu bwobùm wè, ne kulwa bantu bashiilàngàne, bwà kwenda ne bantu bashiilàngàne bàvwà bènza maalu mu mùshindù mushiilàngàne ne bàakula mùshindù mushiilàngàne. Cìvwa ncimwangì mu nsòmbelu wetù.

⁶¹ Cileejilu cilenga cyà dikèmà cìdì Izalèèlà mutùpèèshe, cyà pàakabàbìikilà Nzambi bwà kupatukabo aci. Bààkenza cimwangì, ne bààkapàtuka munkaci mwà—mwà bantu bàà pa buloba, ne bààkalwa ditùnga ditàpùlùke, bwà Nzambi, cisàmbà cyà pabwàci. Bààkenda mwinshì mwà mindidìmbi yà nkwasà wa ngàsà. Bàvwa basòmbèle ne bèndela ku Dikunji dinènè dyà Kapyà. Ne Nzambi wàkabàpàtula mu Èjiipitù, kuya naabò ku buloba bùvwàYe mulayè.

⁶² Nènku, mu cimwangì eci, bààkapèèshibwa mulombodi wa nyumà, mulombodi, uvwa Mòsà, mupròfeta munène mwela maanyi uvwa mu—muntu munène. Úvwa muntu wa difwàna dyà Nzambi, ùvwa mulediibwe muntu wa difwàna dyà Nzambi. Nzambi wàkamubiikila kumuumusha kùdì mamwèndè, kumpàlà mene kwà cikondo aci; Nzambi wàkamujidila kumpàlà kwà difùkà dyà dyulu ne buloba, bwà kwikalayè mulombodi bwà lukòngò alu, bwà kutwàdilayè cisàmbà cimwangì eci.

⁶³ Mwab'ewu kùkaadi cikondo kampànda, ngàkaakula ne bàna bakesè mu tabernacle emu, ne kubènzela kaadiyiisha kakesè; ne kwamba, anyi kufila kaacifwànyikijilu kakesè kàà mùvwà Yoshèbedà, mwàkasambilàye, yèyè ne Amram, tatwèndè wa Mòsà awu, pa kwenza kwà cintu kampànda pa bìvwà bitàngilà disùngila dyà cisàmbà aci. Nènku Amram kumònayè cìkèèna-kumònà cyà Nzambi mwimàne, anyi Mwanjèlo, ùfunkuna lwà ku nord, ne ùmwambila cìvwà mwà kwenzeka. Ki Mòsà mwàna awu kulediibwayè. Ne bóbò kabàakaciina mèyi matùma à mfùmù to, anyi mifuunu yèndè ayi. Bàvwa bamanyè ne Nzambi ùvwa ne cyanza Cyèndè pambidi pàà Mòsà, ne aci ncìvwà cikòse bwalu. Ncyà bushùwà. Cìvwà mfùmù awu wàmba nànsha ciikàle cinyi, cìvwà beena maalu à cìdìdì bàmba nànsha ciikàle cinyi, cìvwà nì ncinyi nì ncinyi cyàmba nànsha ciikàle cinyi, bóbò bàvwa bamanyè ne Nzambi ùvwa ne cyanza Cyèndè pambidi pàà Mòsà. Pa nàнку kabàkaciina bwà kumulekelela nànsha, ànu munkaci mwà ngandù amu mene; pàvwàyi yònsò ànu midyundile ku didyà dyà bàna bakesè bàà beena Ebèlù abu, bwalu bàvwa babeelela ngandù ibadya muntwamu. Kàdi nànsha nàнку Mòsà wàkatèèkiibwa mu kalààlù kakesè ne kutùmiibwa buludì munkaci mwà ngandù ayi, ànu munkaci mwàyì mene amu. Mbwalu, bóbò kabàvwa bàciina cintu nànsha cimwè to, bàvwa bamanyè ne Nzambi ùvwa ne cyanza Cyèndè pambidi pàà Mòsà.

⁶⁴ Èè, mpindiyewu, bu ne tuvwakù ànu mwà kumanya cintu cìmwècimwè aci ne, Mulombodi wetù munènè awu, Nyumà

Mwîmpè, Nzambi ngudi muMutùme. Ne Yéyè ngudi Mulombodi wetù. Ne cidi bàà pa buloba bàmba nànsha ciikàlè cinyi, ne nànsha banùsekè ne banwélùlwile bìshi, twétù tudi tulonda Mulombodi wetù! Nzambi mmutùme Nyumà Mwîmpè bwà kwikalaYè Mulombodi wetù. Nwamònu anyi? “Katanci kakesè aka bàà pa buloba kabààkuMmòna kàbidi to. Kàdi nwènù nenùMmònè, bwalu Nèngiikalè neenù, munda mwènù mene, too ne ku ndekeelu kwà buloba.” Pa nàнку, Mulombodi wetù munène awu ùdi neetù, Nyumà Mwîmpè awu. Mpindyewu butùdi naabù mbwà kulonda Mulombodi ewu ne kwenza ànu menemene mùdiYè wàmba bwà kwenza. Ne Mulombodi ewu kàadyàkutùumushakù mu kajila to, Yéyè neatùlamè dîbà dyònsò ànu mu kajila kàà Mifundu. Kàdi Yéyè kàadyàkuyakù ku luseke *kampànda* bwà cintu kampànda, ne luseke *kansanga* bwà cintu kansanga nànsha. Yéyè neàshaalè ànu kacya wàlulama mu njila wa Mifundu.

⁶⁵ Nènku Mòsà ùvwa ne njila uvwayè ne cyà kuyiishila Izàlèèlà, ne pashiishe kulonda buludi ne kukòsolwela mu Mbù Mukünze, kukòsolwela buludi mu Yadènè, kubwela buludi mu buloba bulaya, kupàtuka buludi ne kukòsolwela mu cipèèlà. Kabìvwa ne Mòsà ngwàkapàtuka mu njila to. Kabìvwa ne Nzambi ngwàkapàtuka mu njila to. Bantu mbàakapàtukà mu njila, kujuulaci ndululu. Pa nàнку, twànjààyibi kwelangana meeji pa maalu aa mpindyewu. (Mfwilààyikù luse.)

⁶⁶ Mòsà, bu mulombodi mwela maanyi. Ndekeelu wa byònsò, pàakamanàye kuleeja bantu, ku bimanyinu ne maalu à kukèma, bìvwà ànu Nzambi nkààyendè mwà kwenza, yéyè wàkenza bimanyinu ebi ne maalu à kukèma kumpàlà kwà bakùlù bàà Izàlèèlà, ne kumpàlà kwà Izàlèèlà, mu mùshindù wà ne bàakatwishiibwa ne Mòsà ewu nguwwa mwela maanyi uvwa ne cyà kubàpàtula mu ditùnga edi, kuya naabò ku buloba bwîmpè bùvwàbo babàlayè abu. Pashiishe pàakamònàbo bintu binène byàkenzà Mòsà mu dîna dyà Nzambi ebi, bààkiitaba bwà kumulonda. Ki kubàpàtulayè, kubàlombola ùkòsolwela mu Mbù Mukünze, kukòsolwelayè mwòmò amu, pàvwa mpa buloba bùme, ne kuyabò mu lwendu lwà mu cipèèlà, lùdi lùumvwijà cikondo cyà mateeta.

⁶⁷ Pàdi muntu wàkidila Kilistò bu Musùngidi wendè, maalu ónsò àdi mu katòngòbèlà. Kàdi, kumpàlà kwà mwinè muntu ewu kubwelayè mu dibàtiiza dyà Nyumà Mwîmpè; muntu ewu, ùdi ne cyà kwanji kupicila ku mùshindù mulongolola wà kujidiibwa. Ùdi ne cyà kupicila mu cikondo cyà dyediibwa ku mateeta mu nsòmbelu wendè. Nwènù bónsò aba nukàadi bapicilemù. Wàkpicila mu cikondo cyà dyediibwa ku mateeta eci. “Mwànà wa balùme yònsò udi ulwa kùdi Nzambi, ùdi wànji kwediibwa mfimbù, kunyookiibwa, kutuciibwa nsokoci. Kàdi twétù katùyi mwà kutwàla dinyooka to, dîbà adi bidi bileeja ne katwèna bàna bàà Nzambi to; tudi bàna bàà mu masandi, katùyi bàna bàà

Nzambi to,” mmùdì Bible mwambè. Kàdì twètù mwà kutwàla dinyooka, bamanyè ne “maalu ónsò àdì àkwàcishangana bwà dyàkalenga dyà bàdì banangè Nzambi,” dībà adi tudì bānà bāà balùmè ne bāà bakàjì bāà Nzambi, dībà adi Yèyè ùdì ùtùtwa citampì cyà Nyumà Mwimpè too ne ku ditùkù dyà bupikudi bwètù. Nwamònu’s, ki dinyooka ndyòdì adi, cikondo cyà diteeciibwa dikolè, cintu citùdì tupìcilamù aci.

Nènku Izalèlèlà, bu cifwànyikijilu cyà mu maalu-malonda, bìvwa bìkèngela kupetayè dinyooka edi.

⁶⁸ Mpindyewu, pàvwàbo mu Èjiipitù apu, ne Nzambi wàkatùma Mòsà. Ki kwololayè dikombo, ne nkùpà ne nkùsù kulwayi pa buloba. Kudyòlayè muditàngije ku dībà, ne dībà kubweladi. Kudyòlayè pa màyi, kwandamukawù mashi. Mòna’s, Izalèlèlà ùvwa ùsanganyibwa mu Kaanààna...lwà mu—mu Gooshèna, bàpicila ànu mu cikondo cyà butùmbi; dībà kadyàkabwelakù tò, bipùpù kabyàkabàtuutakù to; mòna’s, bòbò bàvwa ànu bàpicila mu cikondo cyà butùmbi’s!

⁶⁹ Ànu cyúvwà wèwè mwenzè pawàkasùngidiibwà dyà nzànzànzà aci. Bintu byònsò, maalu ónsò avwa malenga malayà, ne bantu bònsò kulwabo ne kalolo. Nènku, kaa, ekèlekèle, maalu ónsò àvwa ànu mimpè pawàkasùngidiibwà dyà nzànzànzà apu! Pashiishe kulwakù cikondo cyà dyediibwa ku diteeta, cikondo cyà dinyooka, cikondo cyà kujidiibwa, udìjidila wèwè mwine ku bintu byà pa buloba, “kutèeka ku luseke majitu àdì àkujìngila bipeepèlè menemene.” Wèwè, wèwè muntu mulùme, kukèngelabi bwà wèwè kulekela dinwà dyèbè dyà mfwankà, kulekela dinwà dyèbè dyà maalà, kulekela diya dyà ku nzùbù yà manàyi à billards, manàyi èbè à twartà à bufùkù bujimà awu. Bintu byònsò abi, kukèngelabi bwà wèwè kudìjidila ku byòbi, ku diitabuuja mu Mashi à Yesù Kilistò. Udìjidila wèwè mwine! Kukèngelabi bwà nwènù bakàjì kulekela nsukì yènù yileepa, kuleepesha nkanzu yènù, ne kwenza maalu bishiilàngàne ne munùvwà nwenza amu. Cikondo cyà didìjidila! Misangu yàbùngì bàvwa mwà kutomboka kàdì kwalukila cyànyimà; èè, awu kì mmwànà wa Nzambi to, nwamònu’s. Mwanà wa Nzambi ùdì ùtàngila buludì ku Kàlvaryò, ne ùmanya ne mbwà dyàkalenga dyèndè.

⁷⁰ Nànku dībà adi cikondo cyà nshintùlùkilù aci, ki pàakalwà dipidya dinènè dyà diitabuuja mpòpò apu, mu Izalèlèlà. Mu cikondo cinènè eci cyà bantu bùle tètè eci, dībà adi bantu kubangabò kupidya diitabuuja, bùùmuka ku luseke bàya ku lukwàbò. Dībà adi mu yàbò miyiiki: “Èè, tudì tujinga bwà twìkalakù baalùkile mu Èjiipitù mwàmwa’s. Misùukà yètù mmikìne dyàmpà dyà dipeepèle edi.” Mu ngaakwilù mukwàbò, bu mèmè mwà kucyàngata mu mùshindù wà maalu-malonda mpindyewu, ki civwàbo bamba.

⁷¹ Mpindyewu mu ditùkù dyà cyena-leelù edi, ncifwànyine kwikala ne: “Kaa, dilòlò dyònsò dyà diisàtù, disangisha

dyà milombo! Dindà dyònsò dyà dyàlumingu, kwalukila ku èkèleeziyà! Citùdì tuumvwa ki cinyi's? Cintu ànu cimwècimwè aci; muyiishi ùjuuka ùyiisha; misambu; kwalukila." Nwamònu's, díbà adi wèwè's uyàayamù ànu bu bwalu bukwenzeja. Kwèna mukuukwidi to. Mukuukwidi ùyaayamù mbwà kukuukwila, bwà kujìkula bìdiye naabi kumpàlà kwà Nzambi wendè, bwà kutùmbisha Nzambi bwà bwìmpè Bwèndè; ku Dìyì dyònsò, yèyè ùdì ùshààla ànu kacya wàkwàtaKu.

⁷² Mbyenzè ànu mùdì bwalu bwà dinanga's. Byòbì ne uvwa useesela nsongààkàjì bwalu udi mumanyè ne mbwalu bukwenzeja, anyi nuseeselangana ne nsongààlùme, paùcivwà mwànà mutekète apu. "Maman mmuswè bwà mèmè kuseeselangana ne mulùmnyànà ewu, kàdì mèmè ncyènà ànu mwà kumutwàlakù to." Kwèna upeta cintu nànsha cimwe mu kulwa kwèndè bwà kukumòna aku to. Anyi, piikalàci mùshindù wùmwèwùmwè awu bwà nsongààkàjì kùdì nsongààlùmè, anyi nsongààlùmè kùdì nsongààkàjì. Paùdì useesela nsongààkàjì, yèyè ùkutonda; maman ngudi muswè bwà ùmuseesèlè bwalu nnsongààkàjì wa mùshindù wùdì maman munangè. Wamònu's, cìdì cikutonda; bwalu bwà dinanga kabùyikù to nànsha bwà kànà. Kàdì wèwè kwèna ubicyùka to, kùyì muswè bwà kudisàmpulula, kùyì muswè kuya kamumòna to. Nènku cidi. . . Mòna's, ncintu cìbì be. Ne pàdì nsongààlùmè awu ùlwa bwà kukumòna, èkèlekèlè, wèwè udi ùjinga ànu bwà ènze lùkàsà, àalukilè mwàbò.

⁷³ Mmùshindù wùmwèwùmwè awu paùdì wamba ne: "Yèyè ùdì ùyiisha mukùngùlù mule nànkù bwà cinyi? Kàdì bintàkanyì *ebi* mbyà cinyi's, ne bikwàbò byònsò?" Nwamònu's, kwèna mu dinanga to.

⁷⁴ Kàdì paùdì bulelèlè ànu kacya wàlamata ku Dìyì dyònsò, mwànùpèèshi Nyumà didìmwija mu dindà emu amu, nwamònu's ne: "Kulamata ku Dìyì dyònsò." Aci ncifwànyìne kwikala cìvwaYe ùnwàmbila aci. Kacya ànu wakwàta! M'Mwoyi wà Cyendèlèlèlè, Dìyì dyònsò dyà Nzambi. Ndisànkà bwà kuya mu èkèleeziyà, nànsha bwalu kaayi bwenzeke. Kwikalè luuyà lukolè, mashika, bantu bàbènga kucyùka maalu, nànsha bantu bàkòkangana, bàkungula ne mifuunu, cyònsò cidibo bènza aci, cìcìdì ànu disànkà dyà kuumvwa Dìyì dyà Mukalenge. Díbà adi udi mu dinanga díbà adi ne Kilstò, nwamònu's, udi munangè kwikala kuya mu èkèleeziyà.

⁷⁵ "Èè, munanga wanyì, dindà dyà dyàlumingu ndyèdì dyàlù kàbìdì, ngeela meeji ne bìdì bikèngela bwà twètù kwowesha bânà aba màyì ne kuya kuntwaku. Èkèlekèlè, s'mbyà bìcyòkeshangana's!" Wamònu's, kwèna mu dinanga to.

⁷⁶ Kàdì wèwè mu dinanga menemene, kwènà ànu mwà kwindila too ne pàdì dindà dyà dyàlumingu dilwa to, bìkèngela ànu ùyekù naabò kuntwaku. Nènku tudi tupeta, ne bwà kuumuka. . . Bantu bàà Nzambi, kabèèna bàkutonda to.

Mòna's, bàdi—bàdi mbàna bèètù bàà balùmè ne bàà bakàji. Múmvwà ne ciibidilu cyà kwamba ne: “Nudi nudyenza cimuku bu musàbusabu wà Mamvwa à tumbùyi mukwàtàkàne mu dindà dyà mashika.” Kawèna—kawèna wùpòngoloka to, wùdi wùshààla ànu mukwàtàkàne, nudi bamanyè's, ànu ndendende. Mpindyewu, aci's ncyakwidi cikàyàbàle, kàdi cidi—cici—cidi citeeta bwà kunùmanyisha cìndi muswè kwamba, nudi numòna's. Ikàlaayi baswikàkàne. Ne pàdiku kùtàmba kwenza mashika, òwò ùdi ùtàmba kukwàtakana. Nènku mùshindù awu ngùvwàbi bikèngela kwikala bwètù twètù. Pàdiku kùtàmba kwenza mashika . . .

Pàdi balundà bàà pa buloba bàkulekela,
Tùngunukà ne kwikala muswikàkàne Nendè!

⁷⁷ Ne cidi cyèza ne twikalè banangàngàne, muntu ne mukwèndè, kí nnè bwalu tudi kampànda nànsha; kàdi n'Kilistò udi mu muntu ne mukwèndè awu, utùdi tunanga, nudi numòna's. N'Nzambi udi mu buumùntù bwètù awu, utùdi tunanga. Mpindyewu tutu banangè kудisanga pàmwè. Tuvwa kale wàwa twimba muyèngà wà kale ewu ne:

Mwonji wùdi wùswikakajà
Myoyi yètù Mu dinanga dyà bwena Kilistò
wùbeneshiibwè;
Bwobùmwè bwà meeji a buuwetù
Mbufwànàngàne ne bwà ku Dyulu. (Nwamònu
anyi?)

Bwobùmwè bwà meeji à buuwetù
Mbufwànàngàne ne bwà ku Dyulu.

Kumpàlà kwà Nkwasa wa butùmbi wa Taatù
wetù,
Tudi twicikija masambila ètù à kapyà kakolè;
Diciinà dyètù, ditèkemena dyètù, twipàcilà
twètù ntwa mwomùmwè,
Busàmbi bwètù ne ntàtù yètù.

⁷⁸ Nwamònu anyi? Èyowà's, mukalenge! Pàdi umwe mupetè dibènesha, tudi bònsò ne disànkà bwà bwalu abu. Pàdi umwe mubungàme, tudi babungàme pàmwè nendè. Tudi, tudi baswè kwikala bònsò pàmwè. Mpindyewu mùshindù awu ki wutùdi ne cyà kwikala.

⁷⁹ Ne mùshindù awu ngùvwà Izalèlèlè ne cyà kwikala. Kàdi bìkaavwa bilwè bujitu ne: “Kaa, dyàmpà dyà kale dyà dipeepèle edi, dyàmpà dyà Banjèlo's! Èè, citùdi tuditàcishila bwà dyàmpà dyà kale dyà dipeepèle edi ncinyi? Misuùkà yètù's mmikine cintàkanyì eci! Ne byònsò's mbibi. Ne—ne manà à kale àdi àmatà bufuku bwònsò aa, mòna's, s'mbipiciibwe ne twètù ne màtùngulù à ayi ne pwàrò byà mu Èjiipitù abi.” Nudi numòna's, myoyi yàbò kayìvwa milongolola bwà lwendu alu to.

⁸⁰ Ne pàdi mulùme anyi mukàji ùbanga kudyàbakeena bwà diya dyà mu èkèleeziyà, bùmvwà bitàmba kubàtonda bwà diya dyà mu èkèleeziyà, kî mbadilongòlòle bwà lwendu to. Ncyà bushùwà. Kùdi cintu cipampàlámùke mwaba kampànda.

⁸¹ Kaa, paùdi munangè Nzambì, ne wela meeji ne uyààya mu Dyulu, ne nwènù bònsò nuyààya pàmwè:

Bwobùmwè kaayìpu's wè, ndisànkà kaayìpu
dyà kùdi Nzambì's,
Mweyèmène pa dibòkò dyà kashidi;
Kaa, nditalala kaayìpu dibènèshii bwe dyà
kwikala pabwìpi menemene ne Mukalenge
wanyì,
Mweyèmène pa dibòkò Dyèndè dyà kashidi.

Ncinyi . . . Tutu twimba misambu ayi.

Tudi twabanyangana makèngà ètù àdyàcimwè,
Twambwishangana majitu ètù àdyàcimwè;
Ne misangu yàbùngì kùpòngoloka bwà muntu
ne mukwèndè
Cinsònji cyà dyumvwilangana dyà luse.

Patùdi tutàpuluka,
Bìdi bitùpèèsha dikènga munda;
Kàdi netwìkalè ànu baswikàkàne mu mwoyi,
Ne tutèkemena bwà kutwilangana cyàkàbìdì
ku disangisha dyà milòmbò dìdì dilonà.
(Èyowà's, mukalenge, bacìkàle ànu
baswikàkàne mu myoyi!)

⁸² Mpindyewu ukààdi mudilongòlòle bwà lwendu, wamònu's, ukààdi mudilongòlòle bwà kubwela mu Buloba bulaya. Bikondo byà dyediibwa dyà ku diteeta abi, ki mwaba wà njiwù ngwòwò awu; cipèèlà, bikondo byà dyediibwa dyà ku mateeta.

⁸³ Izalèèlà, mu cikondo cyèndè cyà dyediibwa dyà ku diteeta, wàkaditwa mu ditàngangana ne dikòkangana dyà muntu ne mukwèndè, ne dikinà dyà dyàmpà adi. Ne bàakajinga bwà kwalukila mu Èjiipitù.

⁸⁴ Ne dībà adi kubangabo kudyàbakeena bwà mulombodi wabò. Kaa, bàvwa bàciina ne nkwèpi kwàlwàye kubàpàmbula; paanyimà pàà yèyè mumanè kudìleeja ne mmulombodi, ne Nzambì mumanè kujaadika ne yèyè nguvwa mulombodi. “Èè, pàmwàpa tudi benzèku maalu ne ndambù wa dikolesha dyà maalu. Ne—ne pàmwàpa bakutùle lwendu, bònsò balondè dikàsà dibì,” anyi, cintu cyà mùshindù awu, nwamònu's, bàvwa mu miyiiki yàbò bàakula bibi bwà Nzambì ne bwà Mòsà, Nzambì ne mulombodi Wendè.

⁸⁵ Mpindyewu patùdi tukafika mu mùshindù kampànda, wà twamba ne: “Ncyèna mumanyè Dìyì nì ndiswè kwamba *Cikampànda*, anyi to,” ne: “Mèmè ncyèna mumanyè pa biine bidì

bitàngilà Nyumà Mwímpè abi to; ndi ne mpatà ndambù bwà Cyôci aci. Ndi mumanyè ne bakwàbò kabèèna paabu nàнку to.” Èè, ndààku mu Èjiipitù’s. Nwamònu anyi?

⁸⁶ Kàdi pawikalà mupàngàdike bulelèlè bwà kushààla mu njila, shààla ànu ne Mulombodi ewu, Nyumà Mwímpè, shààla ànu ne Díyì. Nènku wèwè mushààle ne Nyumà, Yèyè neàkulamè mu Díyì. Ncyà bushùwà. Yèyè neàye neebè buludì mu njila, kajila kaa Díyì aku. Nènku kwikadikù Nendè bwôwà nànsha. Yèyè kààkukwenzela bibì mu kantu nànsha kàmwè to, Yèyè neàkukwàcishe wèwè mutàpìke. Yèyè neòndopè mpùtá yònsò, Nyumà Mwímpè awu.

⁸⁷ Mpindyewu tudi tusangana ne, mu lwendu lwà mu njila ewu, paanyimà pàà bamanè kwikala mùshindù ewu, bààkafika mu mwaba kampànda wà Holèbà. Nènku H-o-l-è-b-à, Holèba, dībà adi tudi tusangana. . . Twǎnjì tūsunsulààyibì dīnà adi. Mwaba awu ki wùdì dī—dīnà adi *Holèbà* dyùmvwija ne “mwaba múme” anyì “cipèèlà.”

⁸⁸ Nènku patùdì tupàtuka mu bwobùm wè bwà muntu ne mukwèndè mu èkèlezìyà, ne tupàtuka mu bwobùm wè ne Nyumà Mwímpè, cìdì cìkatùfikisha mu mwaba wà múme, mu cipèèlà, kamùyì cintu cìdì ne mwoyi to, byònsò ànu ne tubèjì twà mèbà pambidi apu. Nwamònu’s, ci—cipèèlà, katupà kakesè kàà ntùlu kiikàle ne dyeba adi pambidi. Nukààvwakù bamanye ciinè aci ne ncinyì anyi? Nkabèjì kakesè kanefuke kàà musinga mukolè kàtù kakàyikù kapetè màyi to, kàdi ànu kadivùnge bikolè mu mùshindù wà kavwìjìbwè kaadyèbà. Nènku paùdì umòna muntu wa mùshindù awu, pàmwàpa mmusùukà wà musinga mukolè wùvwàku mufwànyine kwikala mummyaminyìbwe màyi mu mùshindù mwímpè, wùvwàku mufwànyine kwikala dibèjì dikese dyà dinefukè anyì cintu kampànda. Kàdi pamutù pàà cyôci aci, nkadivùnge mu mùshindù wà kashààle dyèbà, ànu bwà kwikala kutwa bintu byònsò, nudi bamanyè’s, kwangulangana bilèma. Cintu cìmwèpelè cìdìwu wùkèngela cìdì ànu mmàyi. Kwàjìkì. Cìdì cìwùkèngelà cìdì ànu di—ditàbuluja, anyì dicìbuluka, dipetuluka cyòshima dipyadìpyà dyà kùdì Mukalenge. Ne—newùwungulukè wòwò mwìnè, bu wèwè ànu mwà kuwùtèeka mwaba wùdì màyi.

⁸⁹ Kàdi, ki mwaba wùdì aba bàdì basòmbèle mu mwaba awu bikèngela bàkèngè ne ngiikàdilù yà mwìnè mwaba awu awu. Nènku aba bàdì baswè kwikala basòmbèle mu cyuyùya cyà mùshindù awu, cyà mwaba wùdì byònsò ànu bitwangana mèbà ne bikòkangana, ne bitàndangana ne bibìndulukilangana mùshindù awu, èè, wèwè’s newikalè ànu musòmbèle mu cyuyùya aci’s, kwàjìkì. Kàdi kabyèna bikèngela bwà twètù kusòmbela amu nànsha, kabyèna ne musinga bwà twètù kushààlamù to.

⁹⁰ Mpindyewu, Holèbà ewu ùvwa mmwaba wàkatekeshiibwà Nzambì mu mabòko kùdì cisàmba aci, bwalu bàvwa balalàkàne mu mwaba ewu ne bakafikè mu ngiikàdilù ewu. Nènku

Yèyè kubàfikisha buludì mwaba awu, bwalu kabàvwa baswè kwendela mu kajila aku to. Bààkuumuka mu—mu njila munène, bayè mu njila wa ku luseke elu. Ki díbà adi kufikishaci Nzambì ku dyenza dyà cintu kampànda cívwa cikwàcishà bwôwà. Yèyè. . . Kufikishaci Nzambi ku dyambila Mòsà bwà kwangatayè dikombo dyà cilumbulwidi dyàkalumbulwishàye naadi ditùnga adi adi, ne kutuuta Lubwebwe, bwà kupàtulalù mâyi.

⁹¹ Mpindyewu, kùdi dileesòna dilenga be mwab'ewu twètù ànu mwà kucyùmva, nwamònu's. Nènku bwalu tudi tutàmba kupàtuka mu cìncyòmpanyòmpa, ne mu myonjì yà maalu à buloba, ne bikwàbò, cyàkafikisha Nzambì ku dyangata manyooka à bàà pa buloba ne kutuuta naawù Mwan'Èndè Sungasunga, ku Kàlvariyo, bwà twamòna mwà kuya badishikàmìne. Nudi bumvwè cìndi muswè kwamba aci anyi?

⁹² Mpindyewu, bwà kufikisha bantu aba ku mâyi kampànda, paanyimà pàà bamanè kufika kuntwaku, mwaba mûme ewu wàkavwijiibwa Kàlvariyo. Ki mwaba awu Nzambì kwambilaYè Mòsà, Yèyè ne: “Angàtà dikombo adi ne bakùlù, ne ndàayi, nènku Mémè nêngiimanè pa Lubwebwe kumpàlà kwèbè aku.” Nènku Lubwebwe elu lùvwa n'Kilistò. Kì Mòsà, ne dikombo dìvwàye mutwàle naadi cilumbulwidi pa ditùnga dyà Izalèèla adi, kwangatayè dyòdi dikombo dimwèdimwè edi e kutuutayè manyooka à Nzambì pa Lubwebwe alu. Nwamònu anyi? Wàkangata mpèkaatù yà bantu kuyèèla pa dikombo edi. Pààbi, bìvwa bikèngela bwà yèyè kwikala mutuutè cisàmbà. Pamutù pàà kutuuta cisàmbà, yèyè kutuuta Lubwebwe. Ki Lubwebwe, ku cyenzi cyà Nzambì, kutwàlalù lupàndu, kutwàdilalù cisàmbà cívwa cyàmba kubùtuka aci mâyi. Kutwàdilalù cisàmbà cívwa cipùnga ne lufù aci mwoyi. Nènku ki cyàkenzà Nzambì pa kwangata kwà kaadikombo Kèndè—Kèndè kàà bulombodi kàà cilumbulwidi aku, ne kujìngila mpèkaatù yànyi ne mpèkaatù yèbè ku dikombo edi; pààbi's bìvwa bikèngela kwikaladi ditùtuutè twètù, kadi dyàkatuuta Kilistò; bwà mu Yèyè kupàtukamù *mâyi*, àdi ùmvwija “Nyumà,” Nyumà Mwìmpè wàkapàtuka munda Mwèndè, bwà kutùpèèsha Mwoyi. Mpindyewu tudi ne Mwoyi wà Cyendèlèèlè. Mpindyewu, Lubwebwe alu lùvwa n'Kilistò. Mpindyewu tudi baswè kumòna.

⁹³ Mémè nkàadi mumònèmòne mishindù yàbùngì yà mazòlà à Lubwebwe elu à mu meeji à mu mitù. Ngàkamòna dimwè dyà à matàmbe kudyudiibwa, àbìdì àdi panshi aa, too ne mu mwaba ùvwa kaa—kaalubwebwe kakesè kasanganyibwa ku lusongo lwà kakùnà kampànda. Nènku—nènku Mòsà ùvwa ne cyà kwikale mutuutà lubwebwe elu, ne Izalèèlè ùvwa kwìnshì aku ne dikopo dyà cyayi, bàpetela cyàkunwà ku kasùlù kakesè kàvwà kàmata kàpàtuka mu kiinè kaalubwebwe aka. Mpindyewu aci's cidi ànu mmwènnenu wa muntu kampànda.

94 Kàdi pààkapàtulà Lubwebwe elu máyi Àlù awu, kùwva bantu bapite pa miliyò yibidì, pa kuumusha ngombe, tuumeelù, ne bikwàbò byònsò byàkanwinà mu bimbaafù byà máyi byàkapàtukàMu. Cìwva mmusùlù wà wùfùkuka wùpàtuka muntwamu!

95 Mùshindù awu ki wùdìbò bàteeta kuvwija Kilistò, Nyumà Mwímpè leelù ewu. “Cìdi ànu dimyamina dikesè.” Nwamònu’s, ànu kakùmbàne bwà kukufikisha ku kwitabuuja ne kùdi Nzambì kampànda. To.

96 M’Máyi à àbòdyodyoka! Davìdi wàkamba ne: “Lupànzà lwànyì lùdi lùyiila ne panshì!” Cìdi ànu ciinà cìdi citùnkumuka ne Nyumà Mwímpè.

97 Bantu bàdi bàMuciina. Bàmwè bantu bàtu bàmba ne: “Èè, mèmè ndi ànu ndambù ne bwòwà bwà ne nèngènzè *cikampànda* anyì *cikansanga*, anyì byòbì byenzèke ne ntambè kuya ndambù mu ndòndò. Ndi mwà kunùleeja muntu kampànda wàkatàmba kuya kule ndambù.” Kàdi wèwè kacya kùtukù mwanjì kufunkuna kùdi ewu utukù kàyi muyè kule byà bikùmbàne awu to. Nwamònu anyì? Èyowà’s, udi wamba bishi bwà aba bàtù kabàyikù bayè kule byà bikùmbàne abu?

98 Mpindyewu, tukààdikù bapetè bantu bààkabwelà mu musunya, kàdi kujuukila ku dikàsà dibì. Nènku—nènku kaciyi Nzambì to, kàdi bantu mbàdi ne. . . Bwà dipanga dyà bulombodi bwímpè, ne bikwàbò, babàjuudile ku dikàsà dibì, ne kubwelabò mu dikolesha dyà maalù. Ne pashiishe buloba bujimà, dyabùlù ùbàfunkwina ne: “Mònaayi cyàcya! Mònaayi cyàcya!”

99 Èè, lekèlaayi mèmè ngiìmanè mu dindà emu mfunkunè paanyimà kùdi bakwàbò bavudija ku miliyò bàvwàku kabàyi nànsha babange to. Kàdi bishi bwà bòbò abu? Nwamònu’s, tàngilàayi wabò ngiikàdilù. Tàngilàayi muntu bu mùdì Eichmann leelù ewu, mwikàle ne bitàmbe kutùmbuka. . . Bàdi bàmba ne: “Beena Mpenta mbapangè nsòmbelu wa bukàlàngà ne mbàà ngaakwilù mukàyàbàle, ne kí mbalongè tùlaasà to,” ne bikwàbò byà mùshindù awu. Tàngilàayi Eichmann, umwe wa ku bantu bàà balongè tùlaasà tutàmba kutùmbuka pa buloba. Kàdi wàkashebeya, mìllyò yisambòmbò yà bânà ne bantu bakàjì ne bantu balùme, mìllyò yisambòmbò yà misùkà. Kwèna muswè kufunkuna kùdi muntu wa mùshindù awu to.

100 Kàdi kaamuntu kakesè kàvwàku kakàyi kamanyè kubala to, bikàkolèle, pàmwàpa kàtèèla bibì dìnà kampànda dyà mu Bible, ne, anyì pàmwàpa mwenzè cintu kampànda anyì mwenzè cintu cibì kampànda, anyì mwenzè cilèma kampànda, bibèjibeji mbiswè kucifùnda mu myaba yònsò, kwamba ne: “Kabyèna bikèngela bwà kubèyemena to.”

101 Dìbà adi piikalà aci kaciyi mwà kweyemenyiibwa to, bwà cinyi kanùyikù nwamba dilonga dyà tùlaasà, bintu ne mamanya à mu mitù bìdìbò naabi leelù ewu ebi? Tàngilàayi Adolphe Hitler.

Tàngilàayi mitù yà meeji yà pa buloba leelù ewu. Bâtàngilaayi. Kasumwinù kàà kale aka kàà ne: “Kubala umwe nkudibala.”

¹⁰² Cintu cidi cìkèngela wèwè kwenza nkwikala mukùmbàne, ku Nyumà Mwimpè, bwà kusunguluja cidi cimpè ne cidi cibi, ne kwangata cidi cimpè ne cidi cibi.

¹⁰³ Mpindyewu, tudi tusangana ne Kàlvariyo kàakapetàbo bôbò aka, kàdi mâyi a mwoyi's àkafùkuka bwà cisàmbà.

¹⁰⁴ Mpindyewu, bàmwè bantu batu bàdyàmbidila mu myoyi yàbò ne mu meeji àbò ne, Izàlèlèlà mujimà bààkanwà, ne pashiishe bààkangata tuumeelù ne bààkaswika majitu àbò pa tubalù twàbò, ne bikwàbò, ne bààkangata bânà bààbò balela ne bààkenza lwendu e kubwela mu mwaba kampànda mukwàbò, ne bààkashìya Lubwebwe alu mwaba awu, lùmacisha tuumamata twà mâyi. Aci's mmafi.

¹⁰⁵ Lubwebwe alu lùvwa lwenda lùbàlonda, ne mâyi awu àvwa ènda àbàlonda. Mpindyewu mu Kolintò wa Kumpàla, nshapità wa 10, ngeela meeji, ku mvensà wa 11, nudi mwà kucipeta, ne: “Lubwebwe alu lùvwa lwenda lùlonda Izàlèlèlà.” Kwònsò kwàkayàbo kubangila ànu ku ditùkù adi aku, Lubwebwe alu lwakaya naabò, ne mâyi àkabàlonda.

¹⁰⁶ Cimfwànyi cilenga kaayipu's wè, ne ci—cikwàcilu cilenga ne lwongò bwà mwena kwitabuuja leelù ewu, udi mumanyè ne Lubwebwe lwàkatuuciibwà musangu kampànda alu, Mâyi àkapòngolokà ku Kàlvariyo musangu kampànda awu, àyaaya neetù kwònsò kutùdi tusanganyiiibwa aku. Kaa, ekèlekèle! Kì nkwalukila ku mwaba kampànda, ne kwamba ne: “Èè, tuvwa bapetè cyà bushùwà Mâyi dyàbwàbwa adi, kuntwaku” to. Tudi ne Mâyi leelù ewu, mwab'ewu mene, bwala Lubwebwe alu lùvwa n'Kilistò! Ne Kilistò ùdi umwèumwè awu makèlèlèlà, leelù, too ne kashidi.

¹⁰⁷ Nwamònu's, Lubwebwe alu lùvwa lwenda lùlonda Izàlèlèlà. Kì mbôbò bàvwà bènda bálonda Lubwebwe alu to, kàdi Lubwebwe alu ndùvwà lwenda lùbàlonda bôbò. Amen. Beena Izàlèlèlà bààkatùngunuka ne lwendu lwàbò. Bàvwa ne cintu cyà dyenza ànu cimwèpelè, ncyà ne, kulama ànu njila mululàme, buludì too ne mu buloba bulaya. Ne Lubwebwe alu ne mâyi bivwa byènda bibàlonda.

... *Lubwebwe* lwenda lùbàlonda bôbò: . . .

Kolintò wa Kumpàla ngudi unwàmbila nàнку awu, nshapità wa 10. Èyo.

... *Lubwebwe alu lùvwa n'Kilistò*.

¹⁰⁸ Nzambì wàkangata manyooka à bantu ne wàkaatèèka pa Kilistò, ne wàkaMutuuta. Nukààvwakù bamòne ne, kùvwa mutanta mu Lubwebwe alu, kubangila ànu apu anyi? Lubwebwe lwàkapeta mutanta, mwaba wàkatuutà Mòsà awu. Ne Kilistò wàkapeta mutanta, pààkatuuciibwàYe apu: “Wàkatàpiibwa

mpùtá bwà dishipa dyètù dyà mikenji, ne ku mibùndàbùndà Yèndè twàkondopiibwa.” Ku Mwoyi awu kupàtukakù Mâyì a Mwoyi atùdì tusànkila leelù ewu aa!

¹⁰⁹ Mpindyewu, bwà kupeta Mwoyi ewu, vùlukàayi ne, Mwoyi wà Kilistò wùdì wùshààla ne Èkèleeziyà. Àlèluuyàh! Kaa, twìkalapù mwà kwelesha meeji ètù lwongò mwaba awu bwà tusunsa dikùmì tùdì tùlondà etu’s wè! Kilistò kèna ùshiyà Èkèleeziyà to. “Mémè nèngiikalè neenù misangu yònsò, too ne ku ndekeelu kwà buloba.” Bantu bôbò mbàdì bàshiyà Kilistò, kí n’Kilistò udi ushiyà bantu to. Bantu bôbò mbàdì bàMushiya, ku bupidyà bwàbò. Bôbò mbàdì bashiyà Kilistò, kí n’Kilistò udi ushiyà bantu to.

¹¹⁰ Izalèlèlà ngwàkuumuka ku musùlù, kí mmusùlù wàkuumuka kùdì Izalèlèlà to. Nwamònu anyi? Bwalu, Bible ùdì wamba bitòòke tòò ne: “Lubwebwe ne màyi bìvwa byènda bilonda Izalèlèlà.” Bibàlonda bôbò! Kwònsò kùvwàbò bàya aku, Lwólù pààlù, nkùvwàlù lùya.

¹¹¹ Kaa, ndi muswè, mu dindà emu, bu ne tùvwa ne dìbà, bwà kubuulula mu nshapità 1 wa Yoshùwà, mùdìYe mwambè ne: “Mwaba wònsò wùdì bidyacilu byà makàsà èbè bìdyata awu, Ngàakupèèshiwù. Kwònsò kùyaayà, Mukalenge Nzambì webè ùdì neebè. Kuciinyikù muntu nànsha umwe to. Ikàlà ne bukitù! Mwaba wònsò mene wùdì udyata dikàsà awu, Mémè ndi neebè mwaba awu mene, nànsha piikàle penyì.” Nzambì wènda ùya ne Yoshùwà!

¹¹² Nzambì umwèumwè awu ùdì ùya ne Èkèleeziyà Wendè mu dindà emu. Tùwinàayi ku Mpokolo ewu kuntu kwàka. Mwaba wònsò wùdì udyata dikàsà, ki wìkalà Nzambì neebè mene, bwà kukupeesha màyi ne kukupèèsha Mwoyi. “Nèngiikalè neebè misangu yònsò, too ne ku ndekeelu kwà cikondo.” Kilistò umwèumwè awu makèlèlèlà, leelù, too ne kashidi. Mikenji yà Nzambì.

¹¹³ Mpindyewu wèwè udi wamba ne: “Dìbà adi, Mwanèètù Branham, bwà cinyì bìdì ne twètù katwèna twenza bintu bìvwà bìkèngelà twètù kwenza? Mmuniyì mùdìbì ne mapà ètù ne bikwàbò mu èkèleeziyà kabyèna bikafikakù ku ditanta dyàwù, ku mwaba wùvwà wùkèngelà kwikalabi? Mmuniyì mùdìbì ne èkèleeziyà wetù kèna ùbàndakù mu cipidì cìvwà cikèngelà kwikalayè?” Bantu, mu cikondo cyà dyediibwa ku diteeta, bàdì bàteketangana ànu mwàkènzà Izalèlèlà amu. Bàdì bèèla meeji ne Nzambì mmubàshiyè.

¹¹⁴ Kàdì, vùlukàayi ne, Lubwebwe alu kacya kalwàkashiyakù Izalèlèlà to. Izalèlèlà ngwàkashiyà Lubwebwe, wàkapwà mwoyi ne Lubwebwe alu lùvwa naabò dìbà dyònsò. Lùvwa ànu mwaba awu, lwàkaya buludì naabò too ne ku ndekeelu kwà njila. “Lùvwa lwènda lùbàlonda.” Kalùvwa ntàntà mule kupita mwaba ùvwa diyì difika to. Kalùvwa ntàntà mule kupita mwaba

ùvwa díyì dyumvwika to. Anyì, kalùvwa ntàntà mule kupìta mwaba ùvwa mèsù mwà kumòna to.

¹¹⁵ Nànsha Kilistò pèndè! Ne Èkèleeziyà leelù ewu, Yèyè kèna ntàntà mule kupìta mwaba ùdi díyì difika to. Bàmwè bàà kunùdi mbatwè cìmpìngà, ne benzè cìdì cibi, ne nudi bajìmjìe disànka adi, ne Màyi ènù mmakàme. Yèyè ùcìdì ànu neenù mu ntàntà wa díyì difika awu. Ùdi wènda ùnùlonda. Yèyè mmumanyè dinyungakana dyònsò dinùdi nwenza ne byònsò binùdi nwenza abi's. Ùdi ùjinga bwà kuumvwakù uMubìikila bwà àmatè mu cyalu.

¹¹⁶ Nènku nkwaka munène wa cyena-mpenta leelù ewu ewu, Nzambi mmwindile bwà nùMubìikilè bwà àmatè mu cyalu. Kanwèna Nendè ntàntà mule kupìta mwaba ùdi díyì difika to. Nànsha byòbi ne tudi benzè bibì, ne benzè mpèkaatù, ne baMukomè nyimà, ne—ne benzè bintu bìvwà kabiyi bìkèngela twètù kwenza to, kàdi nànsha nànkù Yèyè ùdi neetù. Kilistò wàkamba ne Neikalè neetù.

¹¹⁷ Bible mmwambè ne: “Màyi àvwa ènda àlonda bânà bàà Izalèèlà.” Pàvwàbo bùmvwà nyòòtà, bàvwa bamanyè ne màyi àvwa pabwìpi apu.

¹¹⁸ Mpindyewu, bintu ebi mbikòntonona kùdi mikenji kampànda. Ndongolwelu wa Nzambi yònsò mmutèeka kùdi mikenji kampànda. Mpindyewu netwàngatè... Twánjàayi kwimana kakesè.

¹¹⁹ Twàngatàayi buloba. Bùdi bùyùnguluka, mu mèbà ónsò makùmi àbidì ne ànaayi bùdi bwènta dinyùnguluka mu kaabujimà, bipwàngàne menemene, mu mùshindù wà ne... Kacya twètù katùtukù banjì kukùmbana, ne maalu ètù ónsò à mamanya awu, bwà kwenza díbà dyà ku dibòko didì mwà kulama díbà dipwàngàne to. Ku musangu ne ku musangu, mèbà à matàmbe bwìmpè àkaadìbokù benzè awu, munda mwà cidimu cìmwè, neàpicishè anyì neàshaadilè pashìishe ne tusunsa twàbùngì. Kàdi kacya buloba kabùtukù bupangila to bùtu bùfika ànu pa díbà jaajaaja. Mbupwàngàne menemene mu mùshindù wà ne beena maalu à mamanya leelù ewu, balongi bàà maalu à mabùlungà bàdi mwà kukwambila, mu bidimu makùmi àbidì kuumukila ku mpindyewu anyì bidimu makùmi àtaanu kuumukila ku mpindyewu, ànu menemene mwàpítanganà díbà ne ngondo. Pàdìbu bùyùnguluka musangu wàbù wà mèbà makùmi àbidì ne ànaayi, ne bùyùnguluka cikondo cyàbù cyà kunyùngulukila cijèngù aci bwà movù kampànda, kabwèna bupangila kantu nànsha kàmwè to. Àlèluuyàh! Mbupwàngàne, bwalu bùdi bùyùnguluka bilondèshile mukenji wà Nzambi.

¹²⁰ Mbamanyè ànu menemene ne ndìbà kaayi dyàbàndà màyi à mbù, ànu ku kasunsa kònsò, bwalu mbamanyè díbà dyàya ngondo ku cibanda. Ne Nzambi mmutèeke byònsò abi mu bulongàmè ku mukenji kampànda. Nè pàdi ngondo awu ùya

ku cibanda, dibàndà ne dipweka dyà màyi à mbú diyaaya nendè. Pàdì ngondo awu ùbàla, s'ki dibàndà dyà màyi à mbú dilwalwà nendè edi. Ne bôbò mbamanyè menemene, ku dipima dyà dībà, dībà diikalà ngondo mwà kuya ku cibanda. Badi mwà kucifūnda mu kabala-matùkù bidimu kumpàla, ne kukwambila, ànu mu byòbì menemene, pààbanga màyi à mbú awu kupweka. Bushùwà, bwalu mùshindù awu ngùdì ngondo ùpàtuka, bwalu mmuteèka mu bulongàmè bwà mukenji wà Nzambì.

¹²¹ Mwva mwimàne, ditùkù adi, pabwipì ne Dijiba dyà Michigan. Ki mèmè kuya ku Dijiba Ditùmbùke, pàmwvwa mu njila mutàngile ku Canada, mushiki munènè wà màyi awu. Ki mèmè kwimana mwaba awu, ne kudyambidila ne: “Nntàntà wa kilòmèètà búngì kaayi wa disabuka buludì mushiki munènè wà màyi ewu kaaba aka!” Ki pashiishe pàngàakasabukà Mich- . . . anyì Dijiba Ditùmbùke adi, ngàkabwela mu Michigan, mushiki wà màyi wamba kwikala bunènè bùmwebùmwe abu. Nèku kwòkò aku, kuumukila ku Dijiba Ditùmbùke too ne ku Dijiba dyà Michigan, kuumukila ku Dijiba dyà Michigan too ne ku Dijiba dyà Ontario, ne ànu. . . ne ku Huron, ne majiba ónsò masanga ntete. Mmilyaalà búngì kaayi kuvudija ku miliyaalà kuvudija ku miliyaalà, ne ntuku búngì kabùyì kubala bwà màyi à cyashima àvwà àsanganyiibwà mu dijiba adi's wè!

¹²² Kàdì pààbì mu Nevada, ne mu Arizona mwàmwa, mu Nouveau Mexique, mu Californie wa ku Esètè, mùdì mùsanganyiibwa hectares ne hectares yà buloba bume cyoncyonci, bwamba kwoshika. Mbwa bufukè menemene mu mùshindù wà ne, bu màyi awu mwà kufikakù mu buloba abu, ditunga edi's divwa difwànyine kudiisha buloba bujima, kakùyì muntu nànsha umwe wa úfwa ne nzala to, ne kupeta ne byà pamutù byà kwimansa mu mbú. Aci's ncyà bushùwà! Milyò ne milyò yà hectares yìvwà mifwànyine kupatula milyò yà binunu byà kilò byà bilungà byà mpàtatà ne byà mbokà, ne—ne byà nkunde ne byà sàlàdè, ne byà radis ne sèlèrì, ne byà konkombre, ne bikwàbò. Buloba's bývwa bufwànyine kubitólweshà, bùdì—bùdì bùjinga ànu màyi awu.

¹²³ Kàdì ki màyi ngòwò aa *apa*, ne ki buloba mbwòbò ebu lwà kwinsi *eku*. Mpindyewu tudi mwà kucimona, ne tudi bamanyè ne ncifwànyine kucyènzà, bwalu tudi mwà kuteeta màyi ní àdì ne cyashima, ne kuteeta buloba ní bùdì ne bufukè. Mpindyewu, dijinga dyónsò ditùdì mwà kwikala naadì adi, kadyàdyàkubitèekakù byónsò pàmwè to. Kàdì, kùdì mukenji kampànda, ne mukenji awu ngwà dikòkiibwa dyà kùdì buloba. Mpindyewu, bu twètù mwà kukwàta mudimu bilondèshile dikòkiibwa dyà kùdì buloba, tudi bafwànyine kumyamina màyi ku katùpà ne katùpà kònsò kàà buloba abu, twangata màyi à mu majiba bwà kubumyamina. Kàdì nebikengelè bwà twètù kukwàta mudimu bilondèshile mukenji wà dikòkiibwa dyà kùdì buloba. Katwèna mwà kuàpàtula ku dijinga to. Katwèna

mwà kuàpàtula ku dyela dyà mbilà mikolè to. Katwèna mwà kuàpàtula ku dituuta dyà mikòbolo to. Bikèngela tükwatè mudimu bilondèshìle mikenji yà dikòkiibwa dyà kùdi buloba, bwà kuàfikishakù. Nzambi ùdi ùtèèka byònsò mu mukenji.

¹²⁴ Apa, mwawa ngeela meeji, ncyèna mumanyè ní nkààdikù munwàmbile cyôci eci, anyi ncitu munwàmbileci. Mwawa nsanganyibwa mu Kentucky mwàmwa, ngenza bulembi bwà nshindì, ne Mwanèètù Wood, kùkaadi bu cidimu cijimà nànkù awu. Ki twètù. . . Nshindì yìvwa bu yìvwa yìmwèka ne lutàtù, ne pa nànkù twètù kuya kumbèlù kwà muntu kampànda, bwà kakonka ní tuvwa mwà kulemba. Muntu kampànda ùvwa ne hectares yàbùngì yà buloba, ne mu buloba bwèndè amu mùvwa meetu àbùngì. Kàdi Mwanèètù Wood kungambilayè, ne: “Muntu awu mmwena dyàbùlù. Yèyè—yèyè mmwena bupidyà.” Ki kwambayè ne ùvwa mumumanyè, ki yèyè. . . anyi ne tatwèndè ùvwa mumumanyè, ùvwa muswè kuyakù bwà kumulomba ní tuvwakù mwà kupeta dyanyisha dyà kutwà buluwà.

¹²⁵ Twètù kwendesha kàshinyi too ne kumbèlù kwà muntu awu. Nènku yèyè ne muntu mukwàbò, bònsò bàbìdi ne bidimu makùmi mwandamutekète ne byà munjila, bàvwa basòmbe mwinshì mwà mucù wè pomè. Ki Mukalenge Wood kuyayè kùdi muntu ewu, ne kumwambilayè ne: “Ndikù mwà kutwà buluwà ndambù mu mwaba wèbe ewu anyi?” Ki awu ne: “Èè,” yèyè ne, “èyo.” Yèyè ne: “Wèwè udi Wood kaayi’s? Udi mwànà wa Jim Wood anyi?”

Yèyè ne: “Eyowà.”

¹²⁶ Awu ne: “Èè, mukùlumpè Jim ùvwa muntu wa meeji matòoke, ne bikwàbò.” Yèyè ne: “Udi mwà kutwà buluwà mwaba wònsò wùdi muswè, mu mwaba wànyì emu. Ndi ne nkàmà yà hectares bùngiyi mwab’ewu, enzà mùdi mumòne. Pwekà mu bibandabanda byàbya, kwònsò kuwàsàwà aku. Udyùmvwè ànu kwènù kumbèlù.”

¹²⁷ Mémè mwawa musòmbe mu kàshinyi amu, bwalu mwawa ndyàmbedila ne muyiishi ne mwena dyabùlù kabàvwa bafwànyine kupetangana to, muvwàbi ne tuvwa tukulòmba dyanyisha kùdi mwena dyabùlù.

¹²⁸ Ki pashiishe paanyimà pàà katanci, Mwanèètù Wood kwambayè ne: “Èè, mpindyewu, ndikù mwà kuya ne mpaasàtà wanyi anyi? Ngeela meeji ne mbifwànyine kwikala bìmpè bwà kulwayè pèndè.”

¹²⁹ Ki mukùlàkàji ewu kukùdimukilayè pa mukombo wèndè awu, kwambayè ne: “Wood, udi uswa kungambila ne udi mushààle wa ciipanshi menemene, mu mùshindù wà bikèngela bwà wikalè wenda ne muyiishi kwònsò kùyaaya anyi?”

¹³⁰ Ki pa nànkù, mémè kudyàmbedila, paanyimà pàà cyôci aci ne, bìvwa bìmpè bwà mpatukè mu kàshinyi amu. Ki mémè kupàtuka mu kàshinyi amu, ne kuyiikilanganakù

ndambù mukese wa dîbà ne mukùlumpè mukàlàngà awu. Ki kungambilayè ne lùkàsà lwónsò mùvwàye kàyi bwalu ne bayiishi, bwalu ùvwa wèla meeji ne bôbò bàvwa bàmba cintu kampànda civwàbo kabàyi bamanyè kantu nànsha kàmwè to.

131 Yèyè ne: “Bàdi ànu bàlàbakana bàmba bintu kampànda bìdìbo kabàyi bamanyè ne mbinganyì to. Èè,” mwàkambayè, “pàdi muntu wàkula naanyì, ntu muswè ìkalè mumanyè bìdiye wàmba abi.” Mpindyewu, aci’s cidi cyùmvwika cimpè. Aci cidi cyùmvwika cimpè. Yèyè ne: “Mpindyewu, muntu yèyè wàkula naanyì, ncitu muswè bwà kwakulayè pa cintu kampànda, cìkwàbò, didicinkila pa cintu cidiye kàyi mumanyèpu cintu nànsha cìmwè to. Ndi muswè bwà àmbè cintu kampànda cidiye mumanyèpu cidiye wàmba.” Èè, mèmè kutwà aci mushinga. Mèmè kuneemeka aci mu mukùlumpè mukàlàngà awu.

132 Ki mèmè kwamba ne: “Èè, mu bushùwà bwa bwalu, awu’s mmuntu ne muntu ne wendè mmwènenu sungasunga.”

133 Ki yèyè ne: “Kwàkalwa muyiishi kampànda muneemu mu musòkò ewu, kùkaadi ndambù wa bidimu, uvwa mwenzé masangisha ku Acton kwàka.” Ki yèyè ne: “Muyiishi awu, dilòlò kampànda, mwikàle mwenyi mu musòkò amu, kwambilayè inábànzà ka—kampànda uvwa musòmbe mu batèeleji amu ne: ‘Wèwè udi ne mùshwalà mu mpaaya mwèbè amu. Ne udi Màndàmù *Kampànda*. Ne wèwè udi ne mwanèènu wa bakàji udi usaama pa kakùnà apa. Dìna dyèndè n’*Kampànda*. Ùdi munkaci mwà kupùnga ne lufù, ne kànsèrè mu cìfù.’ Ki yèyè ne: ‘Angàtà mùshwalà awu ùkawùtentèkè pambidi pàa mwanèènu wa bakàji awu, ùmwambilè ne: “EMU MMÙDÌ MUKALENGE WÀMBA, kààkufwà to, kàdi neikalè ne mwoyi.”’”

134 Yèyè ne: “Mukàji umwèumwè awu ùvwa mulundà wetù.” Ki yèyè ne: “Twètù kwangata mukàji awu... Mùshwalà awu; anyì muntu mulùme awu, kùdì yèyè muntu awu.” Kumpàla yèyè ne: “Mukàji awu, mèmè ne mukàjàanyì tuvwa kuntwaku mu dindà adi ne bangàte, babèèje mukàji awu. Kàdi ùvwa bibi byà dikèma! Bangàngàbukà bàvwa bamulekèle, kùkaavwa ntàntà. Ùvwa bibi menemene mu mùshindù wà ne bikaavwa bikèngela bwà kwikala kumutentemwina mu cilàmbà cyà kudibwikila, tumutùntumuna bwà kumutèèka pa pô, kumwaluja. Kumukùdimwina mu cilàmbà cyà kudibwikila amu, yèyè ùvwa bibi byà dikèma.” Yèyè ne: “Dilòlò kampànda, kuntwaku, kulwakù mutooyi kampànda bu ne muntu kampànda uvwa mufwe.”

135 Ùvwa m’Ben awu kuntwaku, ne mùshwalà awu, muyè naawù kuntwaku. Ngeela meeji ne ùvwa ngwèwè, kì mmwòmò anyì, Ben? [Mwanèètù Ben Bryant ùdi wàmba ne: “Amen. Amen.”—Muf.] Ùvwa m’Mwanèètù Ben kuntwaku, muyè ne mùshwalà awu, bwalu yèyè nguvwa muyè ne mukàji awu kuntwaku.

136 Ki yêyè ne: “Pàakacyàbu mu dindà, ùkaavwa ùdya mâmpà makàlanga meela pomè.” Ki yêyè ne: “Yêyè kèna wënza ànu mudimu wèndè sungasunga to, kàdi ùdi wënza ne mudimu wa mwena mutumba. Úvwa musàngàle ànu byètù byà menemene ebi!” Yêyè ne: “Mpindyewu mèmè ntu mudyèlèèle nkonko misangu yàbúngì. Mèmè ànu mumòne muyiishi awu, yêyè awu ùvwa mumanyè bìvwàye wàmba,” yêyè ne, “ndi—ndi muswè ngâyiikilanganakù nendè.”

137 Mwanèètù Wood kuntàpayè dísù, ne mèmè kumutàpa dísù. Biimàne mwab’awu, ne manyaanù, ne mukòpàkànè ne bukooyà, bàse bitùdilu mu meetù amu, ne—ne mashi à nshindì pambidi pèètù pajimà. Pa nàнку ki mèmè ne: “Èè,” mèmè ne, “ùdi . . . Udi uswa kwamba ne udi mufwànyine kwakula ne muntu awu ne yêyè mufwànyine kukwambila mùvwàye mucyènzè anyì?”

Yêyè ne: “Èyowà’s, mukalenge, s’ki cìndi muswè kwamba.”

Mèmè ne: “Èè, aci’s—aci’s ncintu cìmpè.”

138 Mvwa munkaci mwà kudyà cìmwè cyà ku bimuma byèndè byà pomè abi. Tuumangùlungà tukesè twà kale twà kàlaabi atu tùvwa twikilapù, nudi bamanyè’s, mu movù wà cidimu wà mabèjì àpòòpoka awu, mu ngondo wa mwandamukùlù. Pa nàнку mvwa ne cimuma cikesè cyà pomè aci, ne nkààvwa mucitwe mènù. Ki mèmè kwamba ne: “Ncimuma cyà pomè cìmpè cyà dikèma’s.” Mèmè ne: “Muci mwinè wàwa wùdi mwaba wàwa kùkaadi ntàntà bule kaayi?”

139 “Kaa,” mwàkambàye, “ndi mukùne mucì wàwa, kùkaadi bidimu makùmi àsàtù anyì makùmi ànaayi, anyì cintu kampànda.”

140 “Èyowà’s, mukalenge.” Mèmè ne: “Ndi njinga ànu kukwelakù lukonko cyanàànà.” Mèmè ne: “Nànsha twamba mwinè mmunyi. . . Ndi mmòna ne bimuma byà pomè byàbya mbimatè ku mucì wàwa, ne mabèjì àwù munkaci mwà kupòòpoka, pèètù bacìkàle ànu munkaci mwà ngondo wa mwandamukùlù.” Ki mèmè ne: “Katwèna nànsha bapetè cikondo cyà citaleela, katwèna nànsha bapetè mashìkà makolè anyì nì ncinyi to, kàdi nànsha nàнку mabèjì awu ngwòwù awu àpòòpoka ku mucì kwàka. Mbwà cinyi nàнку awu?”

Yêyè ne: “Mâyì a mu mucì awu mmuumùke mu mucì.”

“Kaa,” mèmè ne, “mmayè penyì?”

Yêyè ne: “Mmapwekè mu miji.”

Ki mèmè ne: “Dìbà adi neàshaalèmu too ne dìbà kaayi?”

Yêyè ne: “Too ne ku movù wà bintu bitòloka.”

141 Ki mèmè ne: “Dìbà adi ne àbandè àpinganè, àkutwàdila mabèjì mapyamàpyà bwà dilèji, ne bimuma byà pomè bipyabipyà byà kudyà’s.”

Yêyè ne: “Ncyà bushùwà. Cyà bushùwà menemene.”

142 Mémè ne: “Èè, ndi muswè nkukonkèku cintu kampànda, mukalenge. Wèwè udi wakula bwà bantu bàdi kabàyi bamanyè cidibo bamba abu’s.” Mémè ne: “Udikù mwà kungumvwija ne m’Meeji kaayi àdì ènza ne màyi à mu mucì awu àshiyè mucì awu anyi? Ówò mashààlemù mu movù wa mashika, mucì awu mmufwànyine kufwà. Wèwè’s udi mufwànyinè kushipa mucì awu. Mùtòlokù wà mwoyi wùdi mu màyi à mu mucì awu.” Ki mémè ne: “Ncifwànyine kushipa mucì awu. M’Meeji kaayi àdì ènza ne màyi à mu mucì awu àpatukè mu mucì amu, àkabwelè ne miji, ne àshaalèmu too ne mu movù wà bintu bitòloka, ne pashùshe àbandè cyàkàbidì ne àtwalè bikwàbò bimuma byà pomè?” Mémè ne: “Tèèka màyi mu mbekeci ne ùmukùdikè ku dikunji, ùmonèbi ne, mu ngondo wa mwandamukùlù, neàpwekè àye kwìnshi kwà dikunji adi kàdi àpinganè mu movù wà bintu bitòloka. Wamònu anyi?” Mémè ne: “Kùdi mukenji kampànda, kùdi mukenji wà bufùki. Meeji kampànda ngàdi matèèke mukenji awu mu bulongàme. Kaciyi ànu aci to, kàdi bidì bikèngela bwà Meeji àmwèàmwè awu àkwatè mudimu ne mukenji awu, ùdi ùàpwekesha mu muji wà mucì amu, ne àpingana.”

Kwambayè ne: “Kacya ncìvwakù mwanji kwela meeji pa bwalu abu to.”

143 Mémè ne: “Udikù mwà . . . Bu wèwè mwà kujandulakù Meeji àdì ènza ne màyi à mucì awu àpatukè mu matàmbà à mucì awu, àpwekè àkabwelè mu miji ne àpinganè awu, s’ki Meeji àmwèàmwè awu àkangambila kuntwaku dilòdòlò adi awu ne: ‘Ndà, ùtentekè mùshwalà awu pa mukàji awu.’”

Yèyè ne: “Nènku wèwè ki muiyishi awu?”

Mémè ne: “Èyowà’s, mukalenge, ncyà bushùwà.”

144 Cidimu cishààle eci mvwakù (yèyè ùkaadi muyè), ne pàvwà mukàjèndè wa mu lufwilà awu musòmbe mu lutanda, munkaci mwà kuuvula bimuma byà pomè, bipòdla ku mucì wùmfwèwùmfwè awu. Mwanèètù . . . Kumpalà bàvwà ne cyà kutwipata, kabàyi bamanyè ne tuvwa banganyi to. Ki mémè kuya kacilondela mukàji awu, bwà ne twàkapèta dyanyisha kùdi mulume awu. Ne kulodayè bwalu abu, kwamba ne: “Mmwenzè dijìkula mu kaabujimà dyà Kilistò kumpalà kwà kufwàye.”

145 Nudi numòna’s, ncinyi cidi cyènza ne mucì awu, m’Meeji kaayi àdì àpwekesha aci kwìnshi aku awu? Mmukenji kampànda. Mmukenji wùdi Nzambi mutèèke mu bulongàme. Ne mukenji awu ki mukenji wà Nzambi wikalà mwà kucyùka bwalu abu’s. Amen.

146 Nudi bamanyè’s, nànsha wèwè mwelè mbilà munyi, ne wamba—wamba mpindyewu ne: “Kadyàkwikala, dìbà kadyàkukenkesha kàbidì mu movù wa luuyà ewu to.” Nedikenkeshè, nànsha bishi. Nànsha wèwè mwambè bishi ne: “Mémè—mémè—mémè ncyàkulekela bufùkù bulwa to.”

Nebùlwe, nànsha bìshi. Bwalu cintu citudi ne mwoyi mu cyôci eci, cidi cibiiikidiibwà ne buloba eci, ncikòntònònyiiibwe kùdi mukenji wa Nzambì.

¹⁴⁷ Mpindyewu, bânà bèètù bàà balùme ne bàà bakàjì, ndi muswè nnùkonkèku cintu kampànda. Dìbà adi, piikalàbì ne tudi balediibwe cyàkàbìdì ku Nyumà wa Nzambì... Nzambì kàtu ne tutùpà tukesè tutekète ne bitùpà binènè byà bikolè to, Yèyè ùdi Nzambì mu kaabujimà! Bu ne wèwè uvwakù ne Nzambì búngì bukùmbàne munda mwèbè amu, mu mùshindù wà Cyàmba kwikala ànu mundidimbi wètù ewu, abu's mbukolè bukùmbàne bwà kufùka buloba bupyabùpyà. Aci's mbukolè bukùmbàne bwà kufùka ngondo mupyamùpyà ne ndongolwelu mupyamùpyà. S'n'Nzambì, ne ncikolè! Ne mpindyewu mene mwena kwitabuuja yònsò mwab'ewu ùdi ne Mwoyi wà Cyendèlèlè, mbwena kwamba ne, Nyumà wa Nzambì munda mwèbè; Bukolè bukùmbàne bwàjuulà bafwè, bwòndopà babèèdì, bwàtèèkà bijèngù byà mabùlùngà mu ngiikàdìlù. Kàdi wèwè, s'mbukòntònònyiiibwe kùdi mukenji kampànda, Nyumà udi munda mwèbè awu. Nwènù aba's nudi bânà bàà balùme ne bàà bakàjì bàà Nzambì. Nyumà umwèumwè ùdi nendè munda mèbè awu, neàkubiishè wèwè mwinè awu ku ditùkù dyà dibiiikà dyà ku lufù.

¹⁴⁸ Yesù, pàvwàYe pa buloba apa, pààkafwàYe, musùukà Wèndè wàkapweka mu Ìfernò: “Ne wàkayiisha nyumà yìvwà mu bùlokò, misùukà ivwà mu bùlokò, yìvwà kayiyi minyingalàle mu cikondo cyà lutùulù cyà mu matùkù à Noà ayi.” Mubidi Wèndè wàkabwela mu lukità. Kàdi kumpàlà kwà kufwàYe, Wàkalàmbula Nyumà Wèndè mu byanza byà Nzambì. Nyumà Wèndè wàkaya kùdi Nzambì; musùukà Wèndè wàkaya mu Ìfernò; ne mubidi Wèndè wàkaya mu lukità. Ne Yesù wàkapangishiibwa dibiiikà dyà ku lufù too ne pàvwà Mufùndù mwà kuula. Kàvwa mwà kwalukila to, bwalu bìvwa bikèngela Àshààlè mu lukità munda mwà matùkù àsàtù à muunyà ne à bufùku. Kàdi pàakuulà Mufùndu awu wònsò, dipangishiibwa adi dyàkuumushiibwa; Nyumà Wèndè wàkapweka kùdi musùukà Wèndè, musùukà Wèndè kùdi mubidi Wèndè, ne Wàkabiiika ku lufù.

¹⁴⁹ Nènku twètù patwàfwà, misùukà yètù neyìye mwinshì mwà cyoshelu cyà Nzambì; mwaba wùngàakapetà dyésè dyà kumòna, kùkaadi ndambù wa maadindà, munùdi bamanyè amu, mu cikèènà-kumòna, mwaba wùdi Bible wàmba awu. “Nyumà yètù neyìye kùdi Nzambì Wàkayìfila, ne mibidi yètù neyàlukilè ku lupwishi lwà buloba.” Kàdi dīngà ditùkù, piikalà Mufùndu mùle, nyumà yètù neyilekelediibwè kùdi Nzambì, neyàngatè musùukà, ne musùukà newùye kùdi mubidi. Ne Bukolè bwàtùbiiishà ku lufù abu, bùdi munda mwètù mpindyewu mene! Tudi mpindyewu mu myaba yà mu Dyulu. Tudi mpindyewu mu Bukolè bwà dibiiikà dyà ku lufù.

150 Bu ne kakùvwakù mukenji bwà cyôci aci to, bânà bàà balùmè ne bàà bakàjì bàà Nzambi bàvwa bafwànyine kudifùkila buloba kaaba aka ne kwikadilapù ne mwoyi wà pàà nkààyaabò. Wèwè awu udi ne Bukolè munda mwèbè amu bwà kucyènza. Wèwè ne mundidìmbì wa Bukolè bwà Nzambi munda mwèbè amu, udi ne Bukolè bwà kucyènza. Nzambi ngwà bukolè bwònsò. Nudi bumvwè cìndì muswè kwamba aci anyi? Bukolè bùdì munda mwèbè amu abu nebùcyènzè. Wèwè udi mwà kwamba òyì ne buloba kwikalabù kwòkò ne wèwè kuya kasòmbelamù. Àlèluuyàh! Ki bwalu mbwòbù abu's.

151 Ki cìdì Bukolè mu Èkèleeziyà mpindyewu ncyôci aci, kàdì mbukòntonona kùdì mukenji kampànda. Ne mwinè mukenji awu kì ngwà “kutùmikila mèyì kampànda matùma to.” Mmukenji wà diitabuuja. Yesù wàkamba ne: “Bintu byònsò bìdì mwà kwenzeka bwà aba bàdì bìitabuuja.” Nènku bu wèwè mwà kuciitabuuja, cyònsò cyàswà Nzambi kulombola musùukà wèbè bwà kwitabuuja aci, ncyèbè wèwè. Mwaba wònsò wùdì bidyaci lu byènù byà makàsà mwà kudyàta awu, ku diitabuuja, Nzambi ùdì ùkupèeshawù. Amen! Ngwèbè wèwè, udi naawù, bu wèwè mwà kupeta nsapì wa ku mukenji wà diitabuuja ewu udi ukukàngwilawù's wè. Nudi numòna cìndì muswè kwamba aci anyi? Bukolè abu mbukòntonona kùdì. . . Pawikalà mwànà wa balùmè wa Nzambi, pawikala wèwè udi mwànà wa bakàjì wa Nzambi, aci kacyèna cikushiyakù to. Cidi neebè dībà dyònsò. Kàdì, diitabuuja dyèbè ndidì diseesukaKù, kàdì Cidi ànupù. Àlèluuyàh!

152 Paùdì musùngidìibwe, Nzambi ùdì ùkupèèsha diitabuuja bwà wèwè kuujuuka mu bitocì byà pa buloba abi. Diitabuuja dyèbè ndidì dicìmuna maalu à pa buloba. Diitabuuja dyèbè ncinyi? Diitabuuja dyèbè mu cyenzedi cìdì Nzambi mwenzè munda mwèbè aci, bwà kukuvwija mwànà wa balùmè wa Nzambi aci. Udi ulekela mashimi èbè, udi ulekela bwìvì bwèbè, udi ulekela dinwà dyèbè dyà maalà, mbwalu diitabuuja dyèbè didi dikubàndisha kuulu kwàbì. Amen. Wèwè kùyi ucyènza to, kwèna ne diitabuuja nànsha dikese to. “Ne ku diitabuuja nkunùdì basùngidìibwe, ne ciinè aci ku ngàsà.”

153 Mu mùshindù wikalà diitabuuja dyèbè dilekelela awu, ki mu búngì bwà Bukolè bùdì mwà kwikalà naabù, bwalu munda mwèbè mmusòmbèle Bukolè bwà kufùka Maulu ne buloba. Nzambi mmusòmbèle munda mwènù, ne nwènù nudi bânà bàà Nzambi bàà balùmè ne bàà bakàjì. Amen! Ki bwalu mbwòbù abu's. Kàdì, ndiitabuuja dyèbè's. Yesù wàkamba ne: “Bilondèshile diitabuuja dyèbè, bikwenzèkèlè nànkù. Bu wèwè mwà kwitabuuja, bintu byònsò bìdì mwà kwenzeka. Bulelèlè, Ndi nwwàmbila ne, wèwè mwambìle mukùnà ewu ne: “Tentèmùkà,” kàdì kùyi wela mpatà to, kàdì witabuuja ciwàmbi aci.”

154 Dìbà adi mbantu bàà mùshindù kaayi, bàvwàbi bikèngela bwà twètù kwikala, biikale ne diitabuuja mu Kilistò munène udi upikula udi ne mwoyi munda mwètù ewu, Lubwebwe lutuuta lùdì kalùyì lùùmukakù mu Èkèleeziyà elu? “Ndi neenù misangu yònsò, too ne ku ndekeelu kwà buloba mene,” Bwikadi bùdì ànukù dìbà dyònsò bwà ciinà cinènè cìdì citùnkumuka ne lupàndu ne Bukolè bwàkapòngolodiibwà ku Kàlvariyo búbwelè mu Èkèleeziyà abu, Bwikadi bùdì ànukù dìbà dyònsò bwà Nzambì udi ne mwoyi, Lubwebwe lunènè lutuuta lùdì lùtuuta nkòkà, lùdì lwènda lùya neetù mu lwendu lwètù alu.

155 Izalèlèlà wàkajìmija diitabuuja dyèndè. Bàakaseesuka è kuumuka mu kajila. Bàakabanga kwalakana ngeesu yà minyiinyi. Bu bôbò bashàalè ne diitabuuja, ne biikale biitabuuja ne Nzambì ùvwa mwà kubàfikisha ku buloba abu, nùku kakùvwakù mwà kwikala cìvwà mwà kubàpangisha to. S’bàkaavwa bamanè kukàngula mbù, s’bàkaavwa batuutè beena lukunà bààbò bipùpù, s’bàkaavwa bapoopèle beena lukunà bààbò pa nkùrusè paanyimà pààbò, ne babwelè mu buloba abu, kàdi kabàyi ànu mwà kwikala ne diitabuuja dyà kutùngunuka kuya too ne ku mulayi awu to.

156 Yoshùwà ne Kaalèbà bàvwa bôbò ne diitabuuja adi! Bôbò bàakamba ne: “Twètù tudi batàmbe ne bukolè bwà kucimuna cintu kanà cyònsò cìdì cifwànyine kulwa kumpalà kwètù aci’s.”

157 Ki lutàtù ndwòlò alu lùdì naalù èkèleeziyà. Twètù tudi mwà kucimuna disaamà dyònsò. Tudi ne Bukolè abu munda mwètù. Tudi bânà bàà balùmè ne bàà bakàji bàà Nzambì, kakwèna cìdiku mwà kwimana kumpalà kwètù to. Cintu cimwèpelè, Yèyè mmuswè kupeta muntu kampànda wikalakù mwà kuciitabuuja, wikalala mwà kwitabuuja cikaadiku Nzambì mumanè kumwenzela. Ki ne *netwikalè* to; tudi mpindyewu! Ne Bwikadi bwà Nyumà bùdì ne mwoyi dìbà dyònsò abu bùdì neetù. Amen! Ki bwalu mbwòbù abu’s.

158 Ki cìndì muswè kwamba pàngakùlù bwà cyena-bwalu mu dindà emu cyà ne, *Mâyì Adi Anukù Dìbà Dyònsò Àpàtuka Mu Lubwebwe*. Màyi àdi ànukù dìbà dyònsò àpàtuka mu Lubwebwe awu àdi kaaba aka mpindyewu, Màyi àdi ànukù dìbà dyònsò àkapàtukà mu Lubwebwe lutuuta ku Kàlvariyo awu. Pààkapàtukà Nyumà Mwimpè awu munda Mwèndè ku Kàlvariyo apu, wàkaalukila pa Èkèleeziyà mu Ditùkù dyà Mpenta awu, Nyumà Mwimpè umwèumwè awu ùdi kaaba aka mu dindà emu. Ne Yèyè mmutùpèeshe mulayi!

159 Ki bwà cinyi, pàndì nya kumpalà kwà babèèdi, pààkantùmàYe ne mudimu kuntu kwàka, mèmè ndi nciitabuuja; Nzambì ngudi mwambe nàнку! Ki mùdì bikèènà-kumòna byènzeka nàнку; Nzambì ngudi mucilayè! Nzambì kèna mwà kushima nànsha.

160 Cítàbùùjaayi! Bikèngela nùcítàbùùjè. Kùdi ne cyà kwikala Cintu kampànda mwaba awu, cikàngula cijiku aci bwà kukupà mpùngà wa kubwelelapù. Cidì citùkèngelà leelù ewu kî nkusambila bwà kupeta Bukolè butàmbe bùngi to. Wèwè udi ne Bukolè bùngi bukùmbàne bwà kufùka buloba bupyabùpyà. Cidì cikukèngela ndiitabuuja dyà kukwàta mudimu ne bwinè Bukolè abu. Cidì cikukèngela nkukòntonona nsòmbelu awu, ne kwikala ne nsòmbelu wa difwàna dyà Nzambi, mu mùshindù wà ne paùdi ulòmba Nzambi cintu kanà cyònsò, udi mumanyè! Tudi ne dyyemena kùdì Nzambi, bwà cyòci aci. Tudi bamanyè ne, twètù tulama Méyi Èndè matùma, Yèyè kààkutùbèngelakù cintu cimpè nànsha cimwè to, twètù twenda Nendè. Nzambi wènda neetù. Kaa, ekèlekèle!

161 Bòbò bàvwa ne cintu ànu cimwèpelè cyà dyenza. Bàvwa ne cintu ànu cimwèpelè cyà dyenza, ncyà ne, kushààla ànu buludì mu njila. Kí nkulalakana kuya mwaba *kampànda*, ne kulalakana kuya mwaba *kansanga* to; kàdi kushààla mu njila! Èkèleeziyà ùdi ne cintu ànu cimwèpelè cyà dyenza, kushààla mu njila! Bòbò bàvwa ne Dikunji dyà Kapyà, divwàbo naadi, bwà kudìlama bòbò biinè mu njila mu kulonda kwà Dikunji dyà Kapyà adi. Ki cìvwa cìbàlombolà. Kààbò kiipàcilà kàvwàbo bafwànyine kumòna, cìvwa n'Dikunji dyà Kapyà adi. BààkaDimòna dikwàcila mudimu mu Mòsà, ne bàakamanya ne yèyè nguvwa mulombodi.

162 Leelù ewu tudi ne Dìyi. Tudi tulonda Dìyi. Nèku tudi tumòna Dìyi dikwàta mudimu mu beena kwitabuuja, nèku dìbà adi, tudi tumanya ne ki mùdibi nànu. Nzambi ùkwàta neetù mudimu, ùshindika Dìyi ku bimanyinu biikàle byènda bilonda! Tudi tushààla ne Dìyi. Dìyi didi dipàtula bipeta.

163 Bòbò bààkashààla ne Mòsà. Bwalu, Dikunji dyà Kapyà, Mòsà ùvwa ùlonda Dyòdi adi. Nèku bòbò bàvwa bàlonda. Pààkabangàbo kukùdimukila Mòsà, ne kukòkangana bàlwisha Nzambi ne bàlwisha Mòsà, bààkaditwa mu dilalakana kuya ku luseke ne ku lukwàbò. Ndululu kubwelayi. Bushùwà's.

164 Tudi twètù tushààla ne Dìyi, ne Dìyi didi dipàtula bimanyinu. Yesù wàkamba ne: “Bimanyinu ebi nebifilè aba bàdì biitabuuja Dìyi.” Nwamònu's, cidì cishààla ne... Shààlaayi ànu ne Dìyi, Dìyi didi dipàtula bimanyinu. Kàdi, Mòsà, cyàkènzàye ncinyi?

165 Bààkalalakana, kàdi bààkenza cinyi? Bààkalalakana kule ne kajila aku, ne bààkajimija màyi abu.

166 Ngeela meeji ne ki cidì èkèleeziyà mwenzè leelù ewu. Mmulalàkàne kule ne kajila kàà Mifundu. Bàkaadi bakadibwinkè mu tusumbù. Bàkaadi bakadibwinkè mu tuntu tukesè tùvwà katùyi tùkèngela kwenzabò to. Bàkaadi batèèke bintu kampànda. Bàkaadi batèèke bintu bu mùdì Diitaba dyà Bàpostolò. Nudi nusangana aci penyì mu Bible? Bàkaadi batèèke

tùtèshismù tùdìbo bàbala. Bàkaadi batèèke màngumba pamutù pàà dilabula kampànda. Bàkaadi batèèke dilabulangana dyà ku cyanza pamutù paa dilabula dyà dilediibwa dyà cyàkàbìdì. Bàkaadi batèèke dimyaminangana dyà màyi pamutù pàà dibàtiiza dyà mu màyi. Bàkaadi batèèke mùshindù mubì ne: “Taatu, Mwàna, ne Nyumà Mwîmpè,” pàdiku kakùyìkù cintu bu nàнку mu Bible to. Bible mmwambè ne: “Mu Dîna dyà Yesù Kilstò!” Kùdi cintu ànu cimwèpelè cyà dyenza pawikala muswè Màyi àmwèamwè awu, kwalukila cyàkàbìdì ku kajila aku. Kwalukila pa... Yèyè kî mmumùke to; Ûcidì ànu mwab’ewu. Nwènu nudi nwangata twitabàayi pamutù pàà Kilstò. Nudi nulalakana nuya mu bijji bikolè.

167 Umwe mmwambè ne: “Èè, mèmè ndi Méthodiste.”

Mukwàbò wamba ne: “Mèmè ndi Baptiste.”

Aci’s cidi cileeja mùdì kùyì mwena Kilstò, dîbà adi. Twètù tudi bàà Kilstò! Tudi Bèndè Yèyè.

Wèwè udi wamba ne: “Èè, bu, mèmè ewu, Baptiste?”

Aci ní ki cyònsò cyùdì, dîbà adi kwèna wa Kilstò to, udi Baptiste.

Wèwè udi wamba ne: “Èè, mèmè’s ndi mwena Mpenta.”

Pawikalà ànu mwena Mpenta cyanààna ku dîngumba, ki cyònsò cyùdì.

168 Kàdi, pawikalà ne dilabula dyà mpenta’s! Nènku Dìyì dyà mpenta nedìpatulè dilabula dyà mpenta! Londà cintu cimwècimwè cyàkenzà bayiidi aci, shààla kuulu aku too ne paùjiiibwà ne Nyumà Mwîmpè.

169 Nènku dîbà adi wèwè mupetè cyà cibèngàngàne ne Dìyì, nyumà udi munda mwèbè awu yèyè ùya bibèngàngàne ne cidi Dìyì dyamba, dîbà adi awu kî n’Nyumà Mwîmpè to. N’dyabùlù ùtentula Nyumà Mwîmpè. Nudi numòna kutùdì tukafika naaci anyi? Kaa, bàmwè bàà kutùdì mbaakùle mu myakulu, tuvwa ne bikondo byà dyela dyà mbilà, ne bintu byà mùshindù awu, kàdi bavile bikwàbò bintu byònsò ebi. Twètù kwitaba bwà byònsò bidì kabiyi byà mu Mifùndu abi kubwelabi mu èkèleeziyà. Leelù ewu tudi panshi anyi tudi pa kazubu? S’tukàadi baalùkile ku cikwàbò cipèèlà, bulongolodi bume. Tukàadi badìvwijè bulongolodi, ne bajimje ne Màyi ètù miinè. Aci’s ki cidi Mpenta mwenzè ànu menemene. Pàakabangàye kudìvwija bulongolodi wàkabanga kukosolola bwobùmwe, wamba ne: “Èè, mpindyewu katwèna baswè kuswikakana to, piikalàbi ne muntu ewu ùdi wita buuja *cikampànda*.”

170 Tùngunukàayi, shààlaayi nendè too ne pààfikàye ku Dìyì dyà Bulelèlà, dimanya dyà Bulelèlà. Nànsha ciikàle cinyì, cilekèlaayi ciye, nànsha byà munyì. Tùngunukàayi nwènu ànu ne kuya, ikàlaayi ànu bàna bàà muntu.

171 Kàdi, kaa, kukèngelabì bwà twètù kudìvwija bulongolodi, ne kwamba ne: “Èè, bu munudì nwênù kanùyì ba-Unitaires, bu munudì kanùyì ba-Binitaires, anyi ba-Trinitaires, anyì bu *cikampànda* to, katwàkwikala neenù mu bwobùmwè to.” Dìbà adi patùdì twenza nànkù, ncinyì citùdì twenza aci? Tudì tudyàlùja twètù biinè buludì cyàkàbìdì ku cipèlè. Ncyà bushùwà!

172 Kàdi, vùlukàayi ne, Izalèlèlè pàakalalakanàye muumùke mu kajila, njila wa ku buloba bulaya awu, Lubwebwe alu kalwàkabàshiyakù to; Lwòlò lwàkashàala ànu mwaba awu, nànsa màyi awu kàbìdì. Ki mudìbì kàbìdì ne Nyumà Mwìmpè, ùdì ushàala ànupù. Kabyèna bikèngela bwà twètù kulalakana kwalukila cyànyimà to.

173 Mpindyewu, mwaba ewu Nzambì ùdì ùtùlongesha cintu cinène. Mwaba ewu Nzambì ùdì ùtùlongesha dìleesònà kampànda. Kilistò wàkatuuciibwa musangu wùmwèpelè, ùtùpèesha dilabula dyà mpenta, musangu wùmwèpelè, bwà kashidi. Mpindyewu, pàakatuuciibwà Lubwebwe alu, kabìvwa bikèngela bwa kutuuciibwaLu cyàkàbìdì to. Lwàkatuuciibwa musangu wùmwè cyanààna.

174 Mòsà wàkenza cilèma pa kuLutuuta musangu mwibìdì, mwikàle ùleeja butekètè bwà diitabuuja dyèndè mu Difuta dyà cibawu adi. Kàdi Kilistò pàakatuuciibwàye musangu wùmwèpelè apu, tudì bamanyè ne kabyàkukèngela bwà kutuuciibwaYè cyàkàbìdì nànsa. Èè, cìvwa Mòsà wènza aci ncinyì? Mòsà ùvwa munkaci mwà kutèeka cintu kampànda cyà cipyacipyà, ùtèeta bwà kukwàtakaja cintu cyà cipyacipyà.

175 Nènku’s ki cìdì balombodi bèètù bàà èkèleeziyà benzè leelù ewu. Mbatèete kwenza cintu kampànda cyà cipyacipyà. “Netùdìvwijè twètù biinè Assemblées de Dieu. Netùdìvwijè twètù biinè Église Pentecôtiste de Dieu. Netùdìvwije Nsangilu wa Bònsò. Netùdìvwijè *cikampànda*, *cikansanga*, anyi *cikankenga*.” Aci kí ncìdì Nzambì mwenzè nànsa. Aci kí ncìvwa Wendè mmwènenu to.

176 Kilistò wàkatuuciibwa musangu wùmwèpelè. Ki dilabula dyà ku cibangidilu ndyòdì adi. Ki njila wa cibangidilu nyèyè awu. Mu Ditùkù dyà Mpenta, Peetèlò wàkamba ne : “Nyingàlalaayi, yònsò wa kunudì, ne nùbatìijibwe mu Dìna dyà Yesù Kilistò.”

177 “Twètù tudì tumyaminangana màyi mu dìnà dyà ‘Taatu, Mwànà, Nyumà Mwìmpè,’ tufila twitabàayi yà mishindù yònsò ne bikwàbò byònsò pa Cyòcì aci.” Patùdì tuseesuka ku Dìyi, kabyèna bikèmesha to mutùdì katùyiku mwà kukafika mwaba nànsa wùmwè to. Nwamònu anyì?

178 Nzambì ùdì ùtùlongesha dìleesònà kampànda. Kabìvwa bikèngela to bwà Mòsà kwambayè ne: “Mpindyewu netùbangè cintu kampànda cyà cipyacipyà kaaba aka mpindyewu, ne

netùdìvwijè bulongolodi ne netwènzè èkèleeziyà wa Kàtòlikè.” Aci ki cintu cyà kumpalà cidibo benzè. To, pashiishe paanyimà pàà mutanci ne: “Èè, netùbangilèpu cintu kampàndà cyà cipyacipyà, netwènzè ci-Luthèrien.” Pashiishe kulwakù ba-Anglican, ne pashiishe ba-Baptistes, ne bakwabò kàbidì, ne ba-Campbellistes, ne Èglise de Christ, ne mufwilakanyi ne Kilstò, ne bintu bikwabò byònsò. Nwamònu’s, bàakabanga bonsò kuya, ewu ùlonda mukwèndè, ewu ùlonda mukwèndè, bènza màngumba ne malongolodi. Aci kacivwa ncyòci to. Nudi numòna mwaba awu cidibo bènza aci anyi? Bàdi munkaci mwà kutuuta Lubwebwe cyàkàbidì, bwà kubangabò cintu kampàndà cyà cipyacipyà. Kabyèna bitùkèngela dilongesha dipyadìpyà nànsha.

¹⁷⁹ Muntu ne muntu mu Bible wàkabàtijiibwa mu Dìna dyà Yesù Kilstò. Muntu ne muntu mu Bible wàkapeta Nyumà Mwímpè, wàkalwa ùlonda njila wa Nzambì, anù menemene njila uvwa Nzambì mulongòlòle bwà kwikalabi. Bàakenza cintu cimwècimwè aci. Bàakapeta dilabula òmwèdimwè adi. Bimanyinu bimwèbimwè abi byàkabàlonda. Byenzedi bimwèbimwè abi byàkabàlonda. Bwà cinyi? Bàvwa ne mwoyi ku lubwebwe alu. Bàvwa bapetè Màyi àmwèàmwè awu.

¹⁸⁰ Nènku, leelù ewu, cidì cyènzè ne twètù twikalè ne twitabàayi ne màngumba búngi cyanààna, mbwalu tudi tubanga cintu kampàndà cyà cipyacipyà. Kabyèna bitùkèngela cintu kampàndà cyà cipyacipyà nànsha. Alùkilaayi!

¹⁸¹ Kabivwa bikèngela bwà Mòsà kutuutaYè Lubwebwe alu cyàkàbidì to, kubanga cintu kampàndà cyà cipyacipyà. Bivwa bikèngela bwà kwakulayè naabò, ùbàmbila bwà Lubwebwe lwà ku cibangidilu alu. Kàà, ndi ntèkemeni ne nudi bumvwè aci! Bivwa bikèngela bwà Mòsà kwakulayè bwà Lubwebwe lwà ku cibangidilu, lutuuta alu; kabiyi bwà kuteeta bwà kuLùtuuta cyàkàbidì to, kabiyi bwà kuteeta bwà kubanga cintu cyà cipyacipyà to, kàdi kwakula ne Cintu cyà kale aci!

¹⁸² Nzambì, nkwàcìshèku! Pìikalabi ne ndi mfwà bu muntu mulanda, mu cyambilu emu, mèmè nèngàakulè bwà Lubwebwe lwà ku cibangidilu alu! Nèngàakulè bwà dilabula dyà ku cibangidilu adi. Nèngàakulè bwà Mifundù yà ku cibangidilu yàkabapèeshà bòbò abu Nyumà Mwímpè ayi: “Nyingàlàlaayi, yònsò wa kunùdi, ne nùbatijiibwè mu Dìna dyà Yesù Kilstò bwà dilekelediibwa dyà mpèkaatù, nènku nenùpetè kupà kwà Nyumà Mwímpè.” Bwikadi bùdi ànukù dìbà dyònsò bwà Màyi àfùkuka mu Lubwebwe abu bùcidi ànu neetù. NeBùpatulè cintu cimwècimwè aci. NeBùpatulè bikèèna-kumòna. NeBùpatulè dyondopa kabùkabù. NeBùpatulè bipròfeta. NeBùpatulè cintu cyònsò cyàkenzàbo bòbò aci.

¹⁸³ Izalèlèlà pàakaditèèkàye cyàkàbidì mu mulongo mu Mifundù, ne mwalùkile mu njila, bàakatungunuka too ne ku buloba bulaya. Kàdi byàkabàngata bidimu makùmi ànaayi.

184 Mpenta wénjì bidimu bitwè ku makùmi ànaayi anyì makùmi àtaanu, bènda bàlalakana mu cipèèlà. Alùkilaayi ku Lubwebwe! Lùdi kumpàla lumwènèke. S'ncyôci eci, cifùnda kaaba aka mene mu Díyì. Nyumà Mwímpè ùdi apa munkaci mwà kwenza cintu cimwècimwè cikaadiYe mwenzenze misangu yónsò aci, pa nàнку Bwikadi bwà Mâyì butù ànukù dība dyónsò abu's bùdi kaaba aka. Alùkilaayi ànu cyanàànà kùdìBu aku, alùkilaayi ku cyà kale, cyà ku cibangidilù aci. Bìvwa bishì ku cibangidilù?

185 “Èè, bàvwa bàlabula muyiishi ku cyanza anyì”? Cintu bu nàнку to. “Bàvwa bàbàtìijibwa mu dìnà dyà ‘Taatu, Mwànà, Nyumà Mwímpè anyì’”? Cintu bu nàнку kacitukù to. Kakùtukù bantu mu Bible, mwaba nànsha wùmwe, anyì (pakuumusha mu bidimu nkàmà yisàtù) pambèlù pàà Bible, bàkaavwàku bàbàtìijibwe mu dìnà dyà “Taatu, Mwànà, Nyumà Mwímpè.” Aci ntwitabàayi wa Kàtòlikè, kí ndilongesha dyà Bible to. Nwamònu anyì?

186 Bóbò bàvwa ne Nyumà Mwímpè. Bimanyinu ebi bìvwa bìlonda bàvwà bìitabùùje. Nebibàlondè kàbidì leelù ewu. Lubwebwe alu lùdi ne mwoyi kashidi ànu mùvwàlu kwónsò eku amu, Lubwebwe lutuuta alu!

187 Katwàmbikù ne: “Èè, mpindyewu lwà ùshààla wa mu èkèleeziyà wetù wa beena-Mpenta, ùbwela mu bipaapu byètù byà cyenà-Mpenta to.” “To, lwà ùshaalè wa mu ba-Baptistes, anyì ba-Méthodistes, anyì ba-Presbytériens, anyì beena Kàtòlikè.” Ncinyì aci? Aci's nkutuuta Lubwebwe alu cyàkàbidì, kuteeta bwà kutwadija cintu cikwàbò cyà cipyacipyà.

188 Bàmblaayi ne: “Nyingàlalaayi, nùbatìijibwè mu Dìnà dyà Yesù Kilistò,” bwà dilekelediibwa dyà mpèkaatù yàbò, “ne bimanyinu ebi nebilondè aba bàdi bìitabuujà.” Mpindyewu nwalùkìdi mu njila, nwalùkìdi ku Mâyì àmwèàmwè awu. Mâyì àmwèàmwè awu neàfilè cyashima cimwècimwè aci. NeÀfile dikezula dìmwèdìmwè adi ku mubidi. NeÀfile bukolè bwà disukula bùmwebùmwe abu. NeÀfile bukolè bwà dyondopa bùmwebùmwe abu. NeÈnzè cintu cimwècimwè cyènzèlèwu musangu awu aci, bu twètù ànu mwà kwalukila ku Nyumà umwèumwè awu.

189 Mwoyi wùdi mu mwonjì wà mvinyò newùpatulè tumuma twà mvinyò. Pìikalàwu mutùpàtùle cidimu cishààle, newùpatule cintu cimwècimwè aci cidimu eci. Awu mmukenji wà Nzambì. Mukenji wà Nzambì wùdi ne, byòbi ne ewu mmwonjì wa mvinyò, wùlekèlè ànu cyanàànà, newùpatulè tumuma twà mvinyò. Udi mwà kuwùsopakaja ne cikwàbò cintu kampànda, kàdi pashiishe kuwùlekela cyanàànà, newàlukilè cyàkàbidì buludì ku tumuma twà mvinyò tùmwetùmwe atu.

190 Ki mutùkaadi twètù basopàkàje èkèleeziyà ne cyena Mpenta, ne ci-Baptiste, ne ci-Méthodiste, ne ci-presbytérien, ne—ne ci-Anglican, ne kasumbù kàà mùshindù mukwàbò wónsò. Bwà

cinyi kanùyikù nucilekela? Alùkilayi ku Mwonji wà mvinyò, ncyàlukilè ku Bukolè bùmwebùmwe abu. Amen! Amen! Ndi munangè aci.

¹⁹¹ “Babangà cintu kampàndà cyà cipyacipyà.” Cintu cìmwècìmwè citùkaadi benzè aci’s. Kì nkuteeta kuleeja bukòokeshi bwètù to. “Docteur *Kampànda* ki mujuudi wa èkèleeziyà *Kampànda* wa munène wa *bikampànda-ne-bikansanga* awu.” Kacivwa aci nànkù to.

¹⁹² Kì cyàkambà Mòsà ne: “Mémè nêmbàleejè cìndi mwà kwenza. Nêndwe naaci, nànsha bìshi!” KuLùtuutayè, kàkalwa to. Kwelayè cyàkàbìdi lubilà ne: “Nêmbàleejè cìndi mwà kwenza!” Nzambi kulumbatangana Yè nendè bwà cyòci aci.

¹⁹³ Kwikadikù wela meeji ne, bu wèwè “ànu mwà kushààla mukwàte ku dīgumba kampànda.” Nzambi nealumbatangana neebè bwà cyòci aci. Ncyà bushùwà menemene. Bikèngela wàlukilè ku cyà ku cibangidilu aci’s. Alùkilà.

¹⁹⁴ Akulà wèwè ànu ne bantu. (Kùbàmbìdi ne: “Lwàyi nùshaalè bàà mu èkèleeziyà wetù. Lwàyi nwàmbululè twitabàayi wetù twètù to.”) “Alùkilaayi nùnyingalalè, nùbatiijiibwè mu Dìna dyà Yesù Kìlistò, bwà dilekelediibwa dyà mpèkaatù yènu; nènku nenùpetè kupà kwà Nyumà Mwimpè, piikalàbi ne myoyi yènu mmilulàme. Ne bimanyinu ebi nebifilè beena kwitabuuja. Kasumbù kàà beena kwitabuuja, bimanyinu ebi nebibàfilè.” Bwà cinyi? Lubwebwe alu, Lubwebwe lutuuta alu ne Màyì Alù à Mwoyi àdi àpàtuka ànu buludi, àpàtula cintu cìmwècìmwè cyàkenza Yè kwàka aci. KaÈna ànu mwà kupanga kucyènza to. Kàa, èyowà’s.

¹⁹⁵ Twètù tutu ànu baswe kuditwà makumbù, twamba ne: “Twètù tudi ba-Méthodistes, ne ba-Baptistes.”

¹⁹⁶ Akulà wèwè ànu ne Lubwebwe alu cyanààna, Yèyè ùdi Bwikadi bùdiku díbà dyònsò. Kùteeci bwà kushààla wa ku Bwòbù to. Mémè ndi mupetè “dilamakana” mwaba ewu. Wèwè kùteeci bwà kushààla wa ku Bwòbù. Kwèna mwà kushààla wa ku Cyòci eci, ki cintu cìmwèpelè cyà bushùwà ncyòci aci. Udi mwà kashààla wa mu ba-Méthodistes, udi mwà kashààla wamu ba-Baptistes, udi mwà kashààla wa mu beena Mpenta, udi mwà kashààla wa mu ba-Anglicans, kàdi kwèna mwà kushààla wa ku Eci to. To. Bikèngela ùjiibwè tètè ne Eci. Kushàadi wa ku Cyòci to; ujìbwà ànu naaci cyanààna. Kwàjiki. Ncyùle ne cinyi? Ncyùle ne Bukolè, cyùle ne Nyumà, cyùle ne Mwoyi, cyùle ne disànka, ditalala, mwoyi mule, musàngelulu, bwimpè, Bukolè bwà Nyumà Mwimpè mu nsòmbelu webè, bwalu Bwikadi bwà kashidi bùdimù. Vùlukà.

Nebikengèlè bwà njikijè, bwalu díbà dikaadi dyènda dipita.

¹⁹⁷ Kàdi, vùlukàayi ne, Lubwebwe alu kalwàkabàshiyakù to. Kacya kaLwàkabàshiyakù to. Ne Kìlistò kàadyàkutùshiyaku to; Kìlistò mmwambè ne: “Nèngiikalè neenù misangu yònsò, mene

too ne ku ndekeelu kwà buloba.” Ncyà bushùwà anyi? Nènkù Lubwebwe alu lwàkashààla naabò njila mujimà awu kuumukila ànu ku Holèbà to ne ku Neebò. Lwàkashààla naabò cyà bushùwà. Kupweka too ne ku Yadènè, lucivwa ànupù. Eyì Nzambì wa yààya, mèmè ndi muswè kuLùmòna ku Yadènè!

¹⁹⁸ Mòsà, pàvwàye ku Yadènè, Lubwebwe alu lùvwa nendè ku ntwàdijilu too ne ku ndekeelu. Ne yéyè ùvwa mwimànepù, ùtùma mèsù panshi ùtàngila musumbà wa—wa bantu bàvwà batwè cimpingà ne bayè kule ne Nzambì abu. Mwoyi wèndè wùvwa wùbàjinga. Ki kutàngilayè Yadènè. Ki yéyè uvwa ku Yadènè wàwa. Yadènè, wa nyumà awu, ngùndi mèmè ngamba ewu. Nènkù ki yéyè udi mwimànekù wàwa, lufù lùvwa lwenda lùseemena pabwìpì nendè. Kàdi kutàngilayè, ku luseke lwèndè aku kùvwa kusanganyiibwà Lubwebwe alu. Yéyè kutùpika è kubàndayè ànu pa Lubwebwe alu, ne Banjèlo kulwabò, kumwambula è kuyabò nendè.

¹⁹⁹ “Mèmè ncyàdyàkukushìya anyi kukulekelakù nànsha.” Bikondo nànsha bilwè kukola bìshi, nànsha twètù balwè bakùlakajà bìshi, nànsha bafwè lufù lwà mùshindù kaayi, vùlukàayi ne, Lubwebwe alu nelwìkalèku ku Yadènè aku. Lwòlò kalwàdyàkutùshìya anyi kutùlekelakù to. Ikàlàayi ànu bavùlùke nànkù. Bwikadi bwà dìbà dyònsò bwà Mâyì àdi apàtukà mu Lubwebwe awu nebwìkalè neetù mu mwoyi wètù mujimà wà pànwapa, ne mene too ne ku Yadènè.

²⁰⁰ Twìnyikàayi mitù yètù. [Mwanèètu wa balùme kampàndà ùdi ùfila dikànkàmika—Muf.]

²⁰¹ Pàcìdi Nyumà awu ùkwàta mudimu munkaci mwètù apa, Nyumà wa Nzambì munkaci mwà kukwàta mudimu munkaci mwètù, kùdikù mwà kwìkala kaaba aka mu dindà emu aba bàdi kabàyi bamanyè Kilistò, ne wèwè—wèwè kùyì pabwìpì ne Lubwebwe alu, kùyikù mu bwobùmwè naaLù mu dindà emu anyi? Kàdi udi mumanyè ne Lùdipù. Tàngilà mùdiLu munkaci mwà kukwàta mudimu mu myaba yònsò, ùmonè mùdiYe munkaci mwà kunyùnguluka ùtwa eku ùtwa eku, ùmonè mùdiLu lùkwàta mudimu pa bantu. Ki Bwikadi bwà Mâyì bùdiku dìbà dyònsò mbwòbù abu. Ki lupàndù ndwòlò alu. Ki Nyumà udi munkaci mwà kuuja mpànzà yàbò mu mùshindù wà kabàciyikù mwà kushààla bapùwe to, bìkèngela bwà cintu kampàndà cipatukè. Kàdi wèwè kùyì muMumanyè to, udikù mwà kuswà bwà kwela cyanza cyèbè muulu anyi bwà kwamba ne: “Nsambìdilèku, Mwanèètu Branham. Ndi mpindyewu muswè bwà mmuMumanyè. Ne ndi muswè bwà ngààkulèku Nendè, ne ndi muswè bwà mMumanyè bu kaabujimà kàà Nyumà Wendè. Ndi muswè kumanya ne Yéyè udi ku luseke lwànyì mene eku, dìbà dyònsò. Ndi ngiitabuuja ne Yéyè ùdikù. Kàdi ndi muswè bwà mpetèku mèyi a dyakula naawù. Ne mèmè ndi ne nyòòtà, ne ndi ne nzala yà Nzambì. Ndi muswè ntambè kuMumanya”?

202 Nzambi àkubènèshè, mukalenge. Ne Nzambi àkubènèshè, mukalenge. Ne wêwè awu, mwanèètù wa balùme. Wêwè, èyowà, paanyimà lwà mu ndekeelu mwàmwa. Kwinshì eku, inábànzà, èyowà. Èyowà, inábànzà. Twètù tudi bamòne byanza byènù abi, ne Nzambi mmubimòne. Nzambi àkubènèshè, wêwè nsongààlùmè. Nzambi àkubènèshè. Ne wêwè, inábànzà. Amen. Nzambi àkubènèshè. Àkubènèshè, mwanèètù wa bakàjì. Muntu kampànda mukwàbò mpindyewu, mu cikondo cyà cinyàànyà aci. Nzambi àkubènèshè, lwà paanyimà pààpa, wêwè nsongààlùmè.

203 Elàngànaayipù meeji. Elàngànaayipù meeji, Bwikadi bwà Mâyì àdiku dìbà dyónsò àpàtuka mu Lubwebwe awu abu, Nyumà umwèumwè awu; wàkeelelaYè lubilà lukolè Bwendè Yèyè mu ditùkù dyà cilumbulwidi, pààkangatàYe dinyooka dyètù apu awu. Ne lukodi lwà cijji cikolè cyà Nzambi lwàkatuuta pambidi Pèndè, ne mpèkatù yèbè yivwa mijingila mu lukodi alu, ne lwàkaMutuuta, ne Mashi Èndè ne màyi byàkazòlologa bipàtuka munda Mwèndè. KwambaYè ne: “Taatu, mu byanza Byèbè mmùNdí ntèeka Nyumà Wanyi.” Nènku mu Ditùkù dyà Mpenta, Wàkalwa bwà kuya neetù mu lwendu lujimà. Ne Yèyè ùdi pabwìpì nememene mpindyewu.

204 Swàku bwà wámbe ne: “Ndi mulalàkàne kule be ne kumbèlu, Mukalenge, nyewù ngaalukila kumbèlu.” Patùdi munkaci mwà kwimba eci apa, bu wêwèku mwà kuswà kuseemena ku cyoshelu eku, kàbìdì, kwenza didilàmbula dyà cyàkàbìdì, dyà musùùkà wèbè, kùdi Kilistò? Amen.

Mvwa mulalàkàne muye kule ne Nzambi
(Mupàtùke mu kajila.)

Mpindyewu nkàadi ngaalukila kumbèlu;
Ndi mwendèle mu kajila kàa (Bupidyà,
nudi bamònè's.) ntàntà mupite bule ndi
mwendèlemù,

Mukalenge, nkàadi ngaalukila kumbèlu.

Ngaalukila kumbèlu, ngaalukila kumbèlu,
Bwà kubènga kulalakana kàbìdì;
Baalà bikolè mabòkò Èbè à dinanga awu,
Mpindyewu, Mukalenge, nkàadi ngaalukila
kumbèlu.

205 [Mwanèètù Branham ùdi wimbila mu matàma *Mukalenge, Nkàadi Ngaalukila Kumbèlu*—Muf.]

206 Bânà bakesè bàà balùme bàsàtù bàdi bàpàtuka buludì, lukàsà menemene, ne binsònji mu mèsù, batwa binù ku luseke lwà cyoshelu. Mu bushùwà bwà bwalu, mbafwidiiibwè luse. Mbafwidiiibwe luse kumpàlà mene kwà kuumukabò pa myaba yivwàbo basòmbe, pàvwà dipàngadika dyàbò dikesè adi dyàngàciibwe. Nyewù balwè buludì kumpàlà eku batwè binù kaaba aka, bwà bantu kumanyabò ne, nduseke lwà nganyi lùdibò, mu dindà emu.

207 Mvwa mufwànyine kwela meeji ne kùvwàkù mwà kwikala bantu bakùlumpè bàvwà mwà kuswà kwenza cyòci eci, anù kuswà cyanààná bwà kutwà binù, kwamba ne: “Mukalenge, ndi—ndi mulalàkane muyè kule ne kajila. Ndi mupetè mpatà búngì cyanààna, ne míngà misangu ndi mulalàkane mukabwelè mu mpèkaatù. Mpindyewu ndi—ndi muswè bwà kwalukila kumpàlà kwà díbà kwikaladi dipite. Nzambì, ndi—ndi muswè kulwa. Ndi muswè cyà bushùwà ànu muswè bwà kulwa kutwà binù.” Amen.

208 Mpindyewu, bânà bakesè bàsàtù bàà bakàjì bàà Arthur Beam, bamba kwikala bule bùmwe, mbalwè mwab’ewu, batwè binù.

209 Udi usemena ewu mmwànà mukesè wa bakàjì udi mufume ànu ku dipeta mwanààbò wa balùme kwàbò kumbèlu. Ditùkù adi mvwà ànu musòmbe; Mándàmù Wood kulwayè kungambila, kwamba ne mwanèètù wa bakàjì ewu úvwà ùya ku lùpitaadi bwà kulela. Nyumà Mwímpè kwambaYè ne: “Ndà ùbãmbilè ne neikalè mwànà wa balùme.” Pàalediùbùye, úwwa mmwànà mukesè wa balùme.

210 Mbimwèke ne mbânà bakesè mu dindà emu, bânà bakesè bàpàtukila mu kàlaasà kakesè kàà Mwanèètù wa bakàjì Arnold, bàlàmbula nsòmbelu yàbò. Cyoshelu cijimà, ku dyàbalumè dyànyì eku, ncyùle tètè ne bânà bakesè.

211 Mbifwànyine kwikalakù bilenga’s bu twètù mwà kwimba musambu kampànda, cyoshelu, bwà bakwàbò bantu, bakùlumpè.

Mpindyewu, Mukalenge, nkàadi ngaalukila kumbèlu.

Ngaalukila kumbèlu . . (. . . ? . . .)

Bwà kubènga kulalakana kabìdì;
Baalùlà bikolè mabòkò Èbè à dinanga awu,
Mpindyewu, Mukalenge, nkàadi ngàalukila kumbèlu.

212 Twìnyikàayi mitù yètù bwà katanci kakesè cyanààná, bwà disambila, bwà bânà bakesè aba.

213 Taatù wa mu Dyulu, kwòkù kulwà mààlabà kampànda, bu Yesù mwà kunènga kabìdì bwà bikwàbò bidimu dikùmi anyì dikùmi ne bitaanu, aba nunku mbiikalà bânà bàà balumè ne bàà bakàjì bààtwàdilà nkòngò mikwàbò yìcìlwalwà ayi Mukenjì ewu. Kakùyì mpatà to mu àanyì meeji, Mukalenge, bwà ne mu matùkù àbò ónsò à mwoyi nebiikalè bàvùluka ne bààkaseemenakù ku cyoshelu eci. Ne bóbò ntuubilengà twà tukesè, Mukalenge. Tuumyoyi twàbò tukesè twànà tutekète ne twà dinanga atu nyawù twàpiishiibu mu dindà emu. Kabèèna nànsha bateèleje Diyiisha dyónsò to; bafùme àmu ku dipàtuka mu cibambalu amu, ku ditèeleja dyà dyakula dyà Mwanèètù wa

bakàjì Arnold; baseemène mu nyùngulukilu wa cyoshelu kaaba aka, bàfila tuumyoyi twàbò tukesè etu Kùdì.

²¹⁴ Mpindyewu, Taatù, ndi mfùma ku dyakula ngamba ne munda mwètù mmùdì Nyumà Mwímpè musòmbèle. Ne Nyumà Mwímpè ewu, ditabuuja pàmwè ne Nyumà, didi dyènza bintu byònsò. Ne ndi ngiitabuuja ne pa dîbà edi mene, Wèwè udi ufwà luse mpèkaatù yònsò udibò benzè. Ne mèmè ndi nKulòmba, ne diitabuuja dyònsò didi mu mwoyi wànyì ne, Wèwè wàlamakù nsòmbelu yàbò mikesè ayi mu njila mujimà wa lwendu. Swàku bwà kabàpàmbukukù mu Njila ewu nànsha.

²¹⁵ Ncyà bushùwà ne eci ncintu cyà pabwàcì. Nyumà wàmbì mu dindà emu ne, tuvwa mwà “kumòna cintu kampàndà cyà pabwàcì.” Nzambi, Wèwè mujikije kukwàta mudimu ne bakwàbò, wàngatèku bânà bakesè. Mùshindù mwine wùdibi mu dindà emu ne, mu dibìikila dyà ku cyoshelu, kakùyì muntu mukùlumpè nànsha umwe, kàdi musùmbà mujimà wà bânà bakesè bàdi balwè's. Kàdi pààbi, divwa n'Diyiisha dinène dikolè kuumvwa, nànsha mene bwà bantu bakùlumpè, kàdi bânà mbàdì babàkùle Nyumà waDì. Tudi tukwela twasàkidila bwàbò bôbò, Taatù. Ndi nKupèeshabò, mèmè bu musadidi Webè, bôbò bu bivùlukilu byà disangisha edi; bwalu, mwikàle mvùluka ne Bwikadi bwà Mâyì à Mwoyi bùdì ànuku dîbà dyònsò abu nebwikalè bùtuuta nkòkà pàmwè naabò misangu yònsò yikalàbo ne mwoyi. Swàku bwà bìikalèku ne diitabuuja mpindyewu ànu mu cidi munkacì mwà kwenzeka eci ne, Nzambi udi mubàkòke mubùmùshe mwaba wùvwàbo basòmbè awu mubàtùme kaaba aka awu, àswèkù bwà bìikalè ne diitabuuja mu Nzambi awu matùkù àbò ónsò à mwoyi. Swàku bwà nyumà yàbò yà mikesè ayi yàfikishiibwakù Kùdì mu ditùkù dyà lufù lwàbò; yàlujiibwakù ku mubidi wàbò mu ditùkù dyà dibìikà dyàbò dyà ku lufù. M' Bèèbè Wèwè, Taatù. Tudi tuKupèeshabò mu Dînà dyà Yesù.

²¹⁶ Patùcìdì ne mitù yètù miinyika apa. Nèngiikalèku mwà kulòmba bânà bakesè bònsò bàdì ku cyoshelu aba, bàdì biitabuuja ne Yesù m'Musùngidi wenù, ne Yèye ngWànwambìdì, paanyimà apu mu batèèleji amu, bwà nuseemenè mwab'ewu ne nùtwe binù pabwìpì ne cyoshelu apa. Udi witabuuja ne Yesù mmukunangè ne ùdì ùfwà mpèkatù webè luse anyi? Ndi muswè bwà nwènù bonsò nùjuukilè kuulu ne nùtangilè paanyimà ku batèèleji eku. Eci, kì mùshindù wunùdiku mwà kwambila bantu ne nudi nwitabuuja ne Yesù ùdì ùnùsùngila. Mpindyewu, juukilaayi kuulu, ncyà bushùwà, ne nùtangilàayi buludì ku batèèleji. Nwènù bònsò bânà bàà balùmè ne bàà bakàjì batekète bàdì banange Yesù abu, juukilaayi kuulu nùtangilè kùdì disangisha kwàka, yònsò wa kunùdì.

²¹⁷ Kàdi bìshi nwènù bânà bakesè bàà bakàjì bàdì kumpàla eku aba? Nudi nwitabuuja anyi? Nudikù banangè Yesù anyi? Nwènù bânà bakesè bàà bakàjì aba, nudikù banangè Yesù ne mwoyi wènù wònsò anyi? Mmùdìbi anyi? Nudi baMunangè anyi?

Wèwè udi muMunangè anyi, munanga wanyi? Juukilà kuulu wimanyinè apa, bwà bantu kumanyabò ne wèwè udi munangè Yesù. Nzambi àkubènèshè.

²¹⁸ Mpindyewu tükudimukàayi mùshindù ewu ne twìmbàayi bwà bantu aba kumpàlà kwà twètù kuumuka ne: “Yesù mmunnangè! Eci ndi mumanyè, ki mùdi Bible ùngambila.” Nwamònu anyi? Twèlàayi ànu byanza muulu cyanààna patùdi tuwimba apu mpindyewu. Eyo, tuwìmbàayaaku.

Yesù mmunnangè! Ndi mumanyè cyòci eci,
Bwalu ki mùdi Bible ùngambila;
Bànà bakesè m’Bèndè,
Bòbò bàdi ne butekète. . .

²¹⁹ Mpindyewu elàayi byanza muulu...?...Twètù bònsò cyàpàmwè:

Èyowà, Yesù mmunnangè,
Èyowà, Yesù mmunnangè,
Èyowà, Yesù mmunnangè,
Ki mùdi Bible ùngambila.

²²⁰ Mpindyewu nwènù bònsò ambùlùlayi paanyimà pàanyi: Mèmè ndi ngiitabuujà ne Yesù Kilstò ùdi Mwàna wa Nzambi. Leelù, mèmè ndi mMwitaba bu Musùngidi wanyi sungasunga. Kubangila ànu ku ditùkù edì, kubangila ànu ku mpindyewu, mèmè nèmMunangè ne nèmMukwàcìlè mudimu. Amen.

²²¹ [Mwanèètù Ben Bryant ùdi wàmba ne: “Mwanèètù Branham, ndi ne bânà bànaayi pa mwoyi wanyi patùdi twakulangana apa. Udikù mwà kubàsambidila anyi?”—Muf.] Ncyà bushùwà ne nèmàsambidilè, Mwanèètù Ben.

²²² Taatù wa mu Dyulu, muntu ewu nyewù umòna bakwàbò bânà abu bàlwa kùdi Kilstò, ne nyewù wèla lubilà lukolè, bu taatù, bwà bânà bèndè bakesè sungasunga. Nènku Nyumà udi mufikìshe bânà bakesè aba ku cyoshelu awu, swàku bwà Nyumà awu àsungilè bânà bèndè, Mukalenge. Enzàku nànkù. Nyewù tuKupèèshabù, Taatù, mu Dìnà dya Yesù Kilstò.

²²³ Mpindyewu nwènù bânà bakesè panùdi nwalukila ku myaba yenù yinùdi basòmbe apu, ndi muswè bwà bantu bònsò bàdi mu mulongo wàwa abu bàlabulèku bânà bakesè aba ku cyanza, anyi kubàtuutaku tuumapì pàdìbo bènda bàalukila apu. Alùkìlaayi bònsò ku myaba yènù yinùvwà basòmbe, nuyiila *eku*. Ne bantu bònsò bàdi kwàka nàka bàba bìikalè ànu bàtuutakù bânà bakesè abu tuumapì. Ne twètù tudi banùngè ne myoyi yètù yònsò. Nudi bidimba byà Mubidi wà Kilstò, byà mwomùmwe mene mu Wòwò awu ànu mùdi bakwàbò bàà kutùdi amu’s.

Tudi twenda batàngile ku Siònà,
Siònà mulenga, mulenga kumòna;
Tudi twenda tubànda batàngile ku Siònà,
Cimenga cilenga cyà Nzambi aci.

Lwâyi, twêtù bàdi banangè Mukalenge,
 Ne masànkà ètù àmanyishìbwè,
 Tùdisangàayi mu musambu ewu ne cyonà
 cilengèle,
 Tùdisangàayi mu musambu ewu ne cyonà
 cilengèle,
 Ne mùshindù awu tunyùngulukila Nkwasa wa
 butùmbi,
 Ne mùshindù awu tunyùngulukila . . .

Awu nngimbilù mulenga wa dikèma! Twèlàayi byanza
 muulu mpindyewu.

Tudi twenda batàngile ku Siònà,
 Siònà mulenga, mulenga kumòna;
 Tudi twenda tubànda batàngile ku Siònà,
 Cimenga cilenga cyà Nzambi aci.

Tùlabulanganàayi ànu ku cyanza cyanàànà muntu ne
 mukwèndè patùdi twimba mpindyewu apa.

Tudi twenda batàngile ku Siònà,
 Siònà mulenga, mulenga kumòna;
 Tudi twenda tubànda batàngile ku Siònà,
 Cimenga cilenga cyà Nzambi aci.

²²⁴ Mpindyewu tùjuukilàayi kuulu ne mitù yètù miinyika,
 patùdi . . . Imbà musambu awu ku cisanji Mwanèètu Teddy, ànu
 bwà . . .

²²⁵ Ndi ne ndambù wa malòmba mwab'ewu, ne mishwalà
 ne bikwàbò. Bìdi mwà kwikala bifùmìne dyàmwamwà dyà
 mbù. Billy ùvwa ùngambila ne bàvwa ne tushesheetè túbìdi
 twà bàna twà kùdi mwànà wa mu dibòkò mu Angleterre
 mwàmwa, twà bule *ebu's*, kakwàcikwètù aku nkacibùkile panshì
 kakùyì mùshindù to. Ne pa nàнку, bìvwa bìkèngela bwà twètù
 kusambila kabìdi bwà cyòci aci.

²²⁶ Ne pa nàнку . . . [Mwanèètu Ben Bryant ùdi wàmba ne:
 “Mwanèètu Branham, bu wèwè mwà kuswà mfwilèku luse bwà
 dikukosoloja, kàdi sambilàku bwà ne, ewu uvwa mudituute ku
 kàshinyi kèètù makèèlèlè dilòòlò, ku dilata dilami dyà bitoci
 dyà kumpàla ku dyà balumè dyànyì adi, sambilàku bwà cyòci
 aci cyàmòna mwà kusokolodiibwa. Sambilàku bwà Mukalenge
 àcisokòlòlèku.”—Muf.] Amen, Mwanèètu Ben, ncyà bushùwà ne
 nèngènzè nàнку. [Mwanèètu Branham ùdi wimbila mu matàma
Tudi Twènda Tuya Batàngile Ku Siònà.]

²²⁷ Patùdi twenda twenda apa, Mukalenge, tudi bamanyè ne
 Lubwebwe lutuuta alu lùdi ànu neetù mu lwendu mu njila emu,
 Bwikadi bùdi ànukù díbà dyònsò bwà Màyi à mu Lubwebwe
 abu bùdi bwènda bùya pàmwè ne Èkèleeziyà. Èyi Nzambi wa
 Cyendèlèlè, tùpongolwèleku, mu dindà emu, diitabuuja mu
 Nzambi udi neetù ewu. Ndi mumanyè ne Wèwè neucyènzè,
 ànu mutùdiku twètù mwà kuKulengeleela amu, bwà Wamònaku

mwà kutwèyemena naaCì. Wèwè mutùpèèsheCì tètè mu nzùbu tètè pambèlu, tudi bafwànyine kukwàta naaCì mudimu bibì, Mukalenge. Kàdi pùikalàbí ne tudi bapetèku ngàsà Kùdi, cyènzekèku.

²²⁸ Mwanèètù nyewù wàm̀bì ne muntu kampàndà mmudituutè ku kàshinyì kèndè. Èyì Nzambì, tudi bamanyè ne kèna ne mfrangà bwà kwenzayè bintu ebi to. Ndi ndòm̀ba bwà Ùfikishèku muntu awu ku ditwishiibwa, anyì cintu kampànda, bwà yéyè wàm̀onakù mwà kunyingalala bwà dyenza dyà cintu aci, àlwe, wàm̀ba ne: “Mwanèètù, néndongololè kàshinyì kèbèbè aku, mèmè ngudi mucyènzè awu.” Kwàcìshàku Mwanèètù Ben ne bananga bèndè.

²²⁹ Mu cyanza cyànyì emu mùdi mùsanganyiibwa mìshwalà ne malòm̀ba, byà bàdi ne diitabuujà mu Nzambì awu. Mòsà ùvwa ne diitabuujà mu Nzambì awu, ne wàkasabuka mbù. Danyèlè ùvwa ne diitabuujà mu Nzambì awu, ne wàkapàtudiibwa mu bwìnà bwà ntambwe. Shadràkà, Meshàkà, ne Abèdènègò, bàvwa ne diitabuujà mu Yéyè, ne bàakajìma kapyà.

²³⁰ Pòlò ùvwa ne diitabuujà mu Yéyè, ne dinga ditùkù pàvwà masangisha miikàlè makolè menemene ne Pòlò kàyìku mwà kufika kùdì bantu bònsò, wàkangata ànu mùshwalà, wàkamba ne: “Ndi ngiitabuujà ne Nzambì ùdi naanyì.” Ùvwa ùtenteka byanza pa mìshwalà ne tulùlù, ne nyumà mibi yìvwa yùmuka mu bantu, ne mabèèdì ne màsaamà àvwa ùmuka mu bòbò. Nzambì, mèmè ndi ne diitabuujà mu Nzambì umwèumwè awu. Swàku bwà mubi awu ùmukè. Mabèèdì, màsaamà, ne ntàtù, swàku byùmukè, Mukalenge.

²³¹ Wèwè udi Nzambì umwèumwè wàkaakula naanyì mu Dikunji dyà Kapyà adi awu, ku musulù kwàka. Wèwè ki Mwena fòtò Webè udi mukùdika mwaba ewu pàm̀wè naanyì, ku cimanu eku ewu. Wèwè udi neetù, Mukalenge. Wèwè udikù dìbà dyònsò, Dikunji dyà Kapyà dimwèdimwè adi. Ne tudi basànkìlè Màyì à mu Lubwebwe awu ditùkù dyònsò, patùdì tudisanga mu Nyumà apa. Dìbà adi, Wèwè udi apa. Tudi Neebè ne dyeyemena, Mukalenge. Tudi ne diitabuujà mu Wèwè. Tudi twitabuujà ne Wèwè neùtùlaabè maanyì, ne neùtùkwàcìshè. Kabiyi bwà butùmbì bwètù twètù to, Mukalenge; tudi bafwànyine kwikala bu Mòsà dìbà adi, pààkenzàye cintu cibì aci apu. Tudi baswè kwenza cintu kampàndà bwà kuKukwàcìsha wèwè, Mukalenge. Awu ki meeji à mu mwoyi wètù, kukukwàcìsha Wèwè, bu twètù mwà kucyènta. Tùleejèku, Taatù, cyònsò cyùdì Wèwè muswè bwà twètù kwenza aci's.

²³² Nènku mpindyewu, pa cyenzedi cyà diitabuujà, ndi mpiisha mabèèdì àdì mìshwala eyi yìleeja, ne malòm̀ba aa. Neùmukè pa bantu. Ndi mumanyè ne Wèwè ngwacyènta, Mukalenge. Ndi ncìitabuujà, mu mwoyi wànyì ne, Wèwè ngwacyènta. Ondòpàku bubèèdì bwònsò munkacì mwètù mu dindà emu.

²³³ Sùngilàku aba bēdi byanza muulu, bāmbi ne mbaswè kulwa ku Lubwebwe abu, bwà kupeta Māyì. Nzambi, swàku bwà biikalè ne nyòòtà leelù ewu, swàku bwà kwikalèku nsòmbelu wa mutwè mukelè mu nyùngulukilu wabò, mu mùshindù wà bibàfikisha ku diikala ne nyòòtà yà Kilistò. Enzàku nānku.

²³⁴ Ikàlàku neetù dilòòlò edi, Taatù. Éyì Nzambi, enzàku ne, ku malòmba aa, njandulèku cidi pa myoyi ya bantu. Kwòkù kakùyi cintu nànsha cimwè pa mwoyi wàbò to, Mukalenga, díbà adi, Ùmpèèshèku cintu kampàndà cyà mēmè kuyiisha myoyi yàbò dilòòlò edi.

²³⁵ Bèleshàku Mwanèètù Neville, ne mukàjèndè, díkù dyèndè; èkèleeziyà wetù mukesè ewu, balubuludi bèètù, balami bèètù, bidimba byètù. Ne Mubidi Wèbè myaba yònsò, ikàlàku neetù, Taatù. Tudi tulàmbula cyòcì eci mu byanza Byèbè, mu Dìnà dyà Yesù Kilistò.

... Siònà;

Tudi twenda tubànda batàngile ku Siònà,
Cimenga cilenga cyà Nzambi.

Mpindyewu tùMwimbilààyiwù ànu cyanààna, cyà bushùwà, mu bushùwà menemene mpindyewu. Nwamònu anyi?

Lwāyi, twētù bàdi banangè Mukalenge,
Ne masànkà ètù àmanyishiibwè,
Tùdisangàayi mu musambu awu ne cyonà
cilengèle,
Tùdisangàayi mu musambu awu ne cyonà
cilengèle,
Ne mùshindù awu tunyùngulukila Nkwasa wa
butùmbi,
Ne mùshindù awu tunyùngulukila Nkwasa wa
butùmbi.

Ne myoyi yètù miinyika mpindyewu.

Tudi twenda batàngile ku Siònà,
Siònà mulenga, mulenga kumòna;
Tudi twenda tubànda batàngile ku Siònà,
Cimenga cilenga cyà Nzambi.



MÄYI ÄDI ÄNUKÜ DIBÄ DYÓNSÓ ÄPÄTUKA MU LUBWEBWE LUA61-0723M
(The Ever-Present Water From The Rock)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyälumingu mu dindà, mu matükù 23 à ngondo wa mwandamutekète, cidimu cyà 1961, mu Branham Tabernacle mu Jeffersonville, Indiana, U.S.A. Ndyumusha pa mukaba wa mëyi ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2023 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org